


全五代詩
附補遺

八






全 五 代 詩

附 補 遺

(八)

李 調 元 編



叢書集成

初編

主編者
王雲五

商務印書館發行

全五代詩卷四十五

前蜀

張蠙

蠙字象文。清河人。登乾寧二年進士第。爲校書郎。櫟陽尉。犀浦令。王建開國。拜膳部員外郎。終

金堂令。

十國春秋。後主衍奉太后遊大慈寺。見壁間題句云。牆頭細雨垂纖草。水面迴風聚落花。太后深加欣賞。顧問寺僧以蠙對。乃賜霞光牋五百幅。令寫所業詩以進。蠙以二百首獻。衍頗重之。將召爲知制誥。宋光嗣以其輕傲止

之。僅賜白金而罷。蠙生而穎秀。幼能爲詩。咸通時與張喬、許棠、喻坦之、劉燕、任瀆、吳宰、周繇、鄭谷、李棲遠、溫憲、李昌符謂之十哲。作登單于臺。有白日地中出。黃河天外來之句。爲世所稱。後村詩話。張蠙共看今夜月。獨作異鄉人。善狀離別者。塞深行客少。家遠識人稀。善狀邊情者。又宮詞日透珠簾云云。最爲人所傳誦。徐獻忠曰。蠙詩稍通格調。力去補衲之弊。遂不復用事。然天才本少。英旨未奇。至於寫物象情。乃多肖似。

華陽道者

華陽洞裏持真經。心嫌來客風塵腥。惟餐白石過白日。擬騎青竹上青冥。翔螭豈作漢武駕。神娥徒降燕昭庭。長生不必論貴賤。卻是幽人骨主靈。

送成州牧

清時爲塞郡。自古有儒流。素望知難愜。新恩且用酬。犬牙連蜀國。兵額貫秦州。祇作三年別。誰能聽邑留。

送徐州薛尚書

上將出儒中。論詩擬立功。州從禹後別。軍自漢來雄。遠驛銷寒日。嚴城肅暮空。龍顏有遺廟。猶得奠英風。

送縉雲尉

釋褐從仙尉。之官興若何。去程唯水石。公署在雲蘿。野飯樓中迴。晴峯案上多。三年罷趨府。應更戰高科。

送友人赴涇州幕

杏林沈飲散。榮別就佳招。日月相期盡。山川獨去遙。府樓明蜀雪。關磧轉胡鷗。縱有煙塵動。應隨上策銷。

逢漳州崔使君北歸

在郡多殊稱。無人不望回。離城攜客去。度嶺擔猿來。障寫經冬菜。瓶緘落暑梅。長安有歸宅。歸見鎖青苔。

亂中寄友人

別來難覓信。何處避艱危。鬢黑無多日。塵清是幾時。人情將厭武。王澤卽興詩。若使懷深隱。還應聖主知。

哭建州李員外

詩名不易出。名出又何爲。捷到重科早。官終一郡卑。素風無後嗣。遺跡有生祠。自罷羊公市。溪猿哭舊時。

題紫閣院

上方人海外。苔徑上千層。洞壑有靈藥。房廊無老僧。古巖雕素像。喬木挂寒燈。每到思修隱。將回苦不能。

白菊

秋天木葉乾。猶有白花殘。舉世稀栽得。豪家卻畫看。片苔相應綠。諸卉獨宜寒。幾度攜佳客。登高欲折難。
新竹

新鞭暗入庭。初長兩三莖。不是他山少。無如此地生。垂梢叢上出。柔葉籜間成。何用高唐峽。風枝掃月明。
和友人送趙能卿東歸

一第時難得。歸期日已過。相看元鬢少。共憶白雲多。楚闊天垂草。吳空月上波。無人不可遇。之子獨狂歌。
寄法乾寺令諲太師

師居中禁寺。外請已無緣。望幸唯修偈。承恩不亂禪。院多喧種藥。池有化生蓮。何日龍宮裏。相尋借法船。
贈道者

得道疑人識。都城獨閉關。頭從白後黑。心向鬧中閑。飢渴唯調氣。兒孫亦駐顏。始知仙者隱。殊不在深山。
雨

半夜西亭雨。離人獨啓關。桑麻荒舊國。雷電照前山。細滴高槐底。鱗聲疊漏間。唯應孤鏡裏。明月長愁顏。
盆池

圓內陶化功。外絕衆流通。選處離松影。穿時滅藥叢。別疑天在地。長對月當空。每使登門客。煙波入夢中。
和崔監丞春遊鄭僕射東園

春興隨花盡。東園自養閒。不離三畝地。似入萬重山。白鳥穿蘿去。清泉抵石還。豈同秦代客。無位隱商顏。

送友人及第歸

家林滄海東。未曉日先紅。作貢諸蕃別。登科幾國同。遠聲魚呷浪。層氣蜃迎風。鄉俗稀攀桂。爭來問月宮。
一本題下有
新羅二字。

登單于臺

邊兵春盡迴。獨上單于臺。白日地中出。黃河天外來。沙翻痕似浪。風急響疑雷。欲向陰關度。陰關曉不開。
寄友人

戀道復何如。東西遠索居。長疑卽見面。翻致久無書。句麥深藏雉。淮苔淺露魚。相思不我會。明月幾盈虛。
過蕭關

出得蕭關北。儒衣不稱身。隴狐來試客。沙鶻下欺人。曉戍殘烽火。晴原起獵塵。邊戎莫相忌。非是霍家親。
葦

叢叢寒水邊。曾折釣魚船。忽與亭臺近。翻嫌島嶼偏。花明無月夜。聲急正秋天。遙憶巴陵渡。殘陽一望烟。
送董卿赴台州

九陌除書出。尋僧問海城。家從中路挈。吏隔數州迎。夜蚌侵燈影。春禽雜櫓聲。開圖見異跡。思上石橋行。
將之京師留別親友

達命何勞問。西遊且自期。至公如有日。知我豈無時。野迴蟬相答。堤長柳對垂。酣歌一舊袂。明發不堪思。贈別山友

從容無限意。不獨爲離羣。年長驚黃葉。時清厭白雲。舊山迴馬見。寒瀑別家聞。相與存吾道。窮通各自分。宿山驛

驛在千峯裏。寒宵獨此身。古墳時見火。荒壁悄無隣。月白翻驚鳥。雲閑欲就人。祇應明月鬢。更與老相親。宿開照寺光澤上人院

靜室譚元旨。清宵獨細聽。真身非有像。至理本無經。鐘定遙聞水。樓高別見星。不教人觸穢。偏說此山靈。塞下曲

邊事多更變。天心亦爲憂。胡兵來作寇。漢將也封侯。夜燒衝星赤。寒塵翳日愁。無門展微略。空上望西樓。邊將二首

按劍立城樓。西看極海頭。承家爲上將。開地得邊州。磧迴兵難伏。天寒馬易收。朔風一度獵。吹裂錦貂裘。歷戰燕然北。功高劍有威。聞名外國懼。輕命故人稀。角怨星芒動。塵愁日色微。從爲漢都尉。未得脫征衣。

朔方書事

秋盡角聲苦。逢人唯荷戈。城池向隴少。歧路出關多。雁遠行垂地。烽高影入河。仍聞黑山寇。又覓漢家和。經荒驛

古驛成幽境。雲蘿隔四鄰。夜燈移宿鳥。秋雨禁行人。廢巷荆叢合。荒庭虎跡新。昔年經此地。終日是紅塵。

遇道者

數里白雲裏。身輕無履蹤。故尋多不見。偶到卻相逢。古井生雲水。高壇出異松。聊看杏花酌。便似換顏容。

送人歸南中

有家誰不別。經亂獨難尋。遠路波濤惡。窮荒雨露深。燒驚山象出。雷觸海鼇沈。爲問南遷客。何人在瘴林。

途次績溪先寄陳明府

入境風烟好。幽人不易傳。新居多是客。舊隱半成仙。山斷雲衝騎。溪長柳拂船。何當許過縣。聞有篋中篇。

雲朔逢山友

會面卻生疑。居然似夢歸。塞深行客少。家遠識人稀。戰馬分旗牧。驚禽曳箭飛。將軍雖異禮。難便脫麻衣。

野泉

遠出白雲中。長年聽不同。清聲縈亂石。寒色入長空。挂壁聊成雨。穿林別起風。溫泉非爾數。源發在深空。

薊北書事

度磧如經海。茫然但見空。戍樓承落日。沙塞礙驚蓬。暑過燕僧出。時平虜客通。逢人皆上將。誰有定邊功。

貽曹郎中

所作高前古。封章自由臺。細看明主意。終用出人才。省印尋僧鎖。書樓領鶴開。南山有舊友。時向白雲來。

別後寄友生

上馬如飛鳥。飄然隔去塵。共看今夜月。獨作異鄉人。就養江南熟。移居井賦新。襄陽曾卜隱。應與孟家鄰。

邊遊別友人

欲別不止淚。當杯難強歌。家貧隨日長。身病涉寒多。雨雪迷燕路。田園隔楚波。良時未自致。歸去欲如何。

邊庭送別

一生雖達理。遠別亦相悲。白髮無修處。青松有老時。暮煙傳戍起。寒日隔沙垂。若是長安去。何難定後期。

送友人歸武陵

聞近桃源住。無村不是花。戍旗招海客。廟鼓集江鴉。別鳥垂橙實。閑田長荻花。遊秦未得意。看卽更離家。

弔孟浩然

每每樵家說。孤墳亦夜吟。若重生此世。應更苦前心。名與襄陽遠。詩同漢水深。親栽鹿門樹。猶蓋石牀陰。

次韻和友人冬月書齋

四季多花木。窮冬亦不凋。薄冰行處斷。殘火睡來消。象版簽書帙。蠻藤絡酒瓢。公卿有知己。時得一相招。

過山家

避暑得探幽。忘言遂久留。雲深窗失曙。松合徑先秋。響谷傳人語。鳴泉洗客愁。家山不在此。至此可歸休。

宿山寺

中峯半夜起。忽覺有青冥。此界自生雨。上方猶有星。樓高鐘尙遠。殿古像多靈。好是潺湲水。房房半誦經。

鄭穀補闕山松

心將積雪欺。根與白雲離。遠寄僧猶憶。高看鶴未知。影交新長葉。皴匝舊生枝。多少同時種。深山不得移。

贈棲白太師

剃髮得時名。僧應別應星。偶題皆有詔。閑論便成經。埽葉寒燒鼎。融冰曉注瓶。長因內齋出。多客叩禪扃。

贈聞一上人

見面雖年少。聞名似白頭。元談窮釋旨。清思遠詩流。果落痕生砌。松高影上樓。壇場在三殿。應召入焚修。

贈可倫上人

師教本於空。流來不自東。修從多劫後。行出衆人中。衲冷湖山雨。幡輕海甸風。游吳累夏講。還與虎溪同。

寄太白禪師

何年萬仞頂。獨有坐禪僧。客上應無路。人傳或見燈。齋廚唯有橡。講石任生藤。遙想東林社。如師誰復能。

費徵君舊居

浮世拋身外。棲蹤入九華。遺篇補樂府。舊籍隸仙家。池靜龜昇樹。庭荒鶴隱花。古來天子命。還少到煙霞。

送友尉蜀中

故友漢中尉。請爲西蜀吟。人家多種橘。風土愛彈琴。水向昆明闊。山通大夏深。理閑無別事。時寄一登臨。

送南海僧遊蜀

眞修絕故鄉。一衲度暄涼。此世能先覺。他生豈再忘。定中船過海。臘後路沿湘。野迴鴉隨笠。山深虎背囊。瀑流垂石室。蘿蔓蓋銅梁。卻後何年會。西方有上房。

和友人許裳題宣平里古藤

欲結千年茂。生來便近松。迸根通井潤。交葉覆庭穠。歷代頻更主。盤空漸變龍。晝風圓影亂。宵雨細聲重。蓋密勝丹桂。層危類遠峯。嫩條懸野鼠。枯節叫秋蛩。翠老霜難蝕。皴多蘚乍封。幾家遙共翫。何寺不堪容。客對忘離榻。僧看誤過鐘。頃因陪預作。終夕遶枝筇。

送薛郎中赴江州

幾州聞出刺。謠美有江民。正面傳天旨。懸心禱岳神。尺書先假路。紅旆旋燒塵。郡顯山川別。衙開將吏新。散招僧坐暑。閑載客行春。聽事棋忘着。探題酒亂巡。好編高隱傳。多貌上昇眞。近日居清近。求人在此人。

送翰林張侍郎

舉家貧拾海邊樵。來認仙宗在碧霄。丹穴雖無凡羽翼。靈椿還向細枝條。九衢馬識他門少。十載身辭故國遙。願與吾君作霖雨。且應平地活枯苗。

投翰林蕭侍郎

九仞牆邊絕路歧。野才非合自求知。靈湫豈要魚棲浪。仙桂那容鳥寄枝。纖草不銷春氣力。微塵還助岳

形儀從來爲學投文鏡。文鏡如今更有誰。

贈信安太守

三衢正對福星時。喜得君侯妙撫綏。甲士散教耕壟畝。書生閑許從旌旗。條章最是貧家喜。禾黍仍防別郡饑。昨日中官說天意。卽飛丹詔立新碑。

贈南昌宰

假邑邀真邑。命分明庭元有至。公存每鋤奸弊同荆棘。唯撫孤惻似子孫。折獄不曾偏下筆。靈襟長是大開門。新銜便合兼朱紱。應待蒼生更舉論。

贈邱衙推

仙都高處掩柴扉。人世聞名見者稀。詩逸不拘凡對屬。易窮皆達聖元微。偶攜童稚離青嶂。便被君侯換白衣。任醉賓筵莫深隱。綺羅絲竹勝漁磯。

獻所知二首

十五年看帝里春。一枝頭白未酬身。自聞離亂開公道。漸數孤貧少屈人。劣馬再尋商嶺路。扁舟重寄越溪濱。省郎門似龍門峻。應借風雷變涸鱗。跡熟荀家見弟兄。九霄同與指前程。吹噓漸覺馨香出。夢寐長疑羽翼生。住僻驂騑皆識路。來頻鸚鵡亦知名。登龍不敢懷他願。祇望爲霖致太平。

下第述懷

十載長安跡未安。杏花還是看人看。名從近事方知險。詩到窮元更覺難。世薄不慚雲路晚。家貧唯怯草堂寒。如何直道爲身累。坐月眠霜思枉乾。

喜友人日南迴

南遊曾去海南涯。此去遊人不易歸。白日霧昏張夜燭。窮冬氣暖著春衣。溪荒毒鳥隨船啣。洞黑冤蛇出樹飛。重入帝城何寞寞。共迴遷客半輕肥。

長安春望

明時不敢臥煙霞。又見秦城換物華。殘雪未銷雙鳳闕。新春已發五侯家。甘貧祇擬長緘酒。忍病猶期強採花。故國別來桑柘盡。十年兵踐海西槎。

過黃牛峽

黃牛來勢瀉巴川。疊日孤舟逐峽前。雷電夜驚猿落樹。波濤愁恐客離船。盤渦逆入嵌空地。斷壁高分繚繚天。多少人經過此去。一生魂夢怕潺湲。

逢道者

縱意出山無遠近。還如孤鶴在空虛。昔年親種樹皆老。此世相逢人自疎。野葉細苞深洞藥。崖蘿閒束古仙書。祇尋隱跡歸何處。方說煙霞不定居。

邊情

窮荒始得靜天驕。又說天兵擬渡遼。聖主尙嫌蕃界近。將軍莫恨漢庭遙。草枯朔野春難發。冰結河源夏半銷。惆悵臨戎皆効國。豈無人似霍嫖姚。

贈李司徒

承家拓定隴關西。勳貴名應上將齊。金庫夜開龍甲冷。玉堂秋閉鳳笙低。歡筵每恕嬌娥醉。閑櫪猶驚戰馬嘶。長怪魯儒頭枉白。不親弓劍覓丹梯。

送盧尙書赴靈武

西北正傳烽候急。靈州共喜信臣居。從軍盡是清才去。屬郡無非大將除。新地進圖移漢界。古城遺碣見蕃書。山川不異江湖景。賓館常聞食有魚。

宴駙馬宅

牙香禁樂鎮相攜。日日君恩降紫泥。紅藥院深人半醉。綠楊門掩馬頻嘶。座中古物多仙意。壁上新詩有御題。別向庭蕪眞吟石。不教宮妓踏成蹊。

邊將

上馬乘秋欲建勳。飛弧夜闕出師頻。若無紫塞煙塵事。誰識青樓歌舞人。戰骨沙中金鏃在。賀筵花畔玉蟬新。由來邊卒皆如此。只是君門合殺身。

贈水軍都將

平生爲有安邦術。便別秋曹最上階。戰艦卻容儒客臥。公廳唯伴野僧齋。裁書榭迴冰膠筆。養藥堂深薜
惹鞋。直待門前見幢節。始應高愜聖君懷。

贈九江太守

江頭暫駐木蘭船。漁父來誇太守賢。二邑旋添新戶口。四營漸廢舊戈鋌。笙歌不似經荒後。禮樂猶如未
戰前。昨日西亭從游騎。信旗風裏說詩篇。

贈江都鄭明府

他人豈是稱才術。才術須觀力有餘。兵亂幾年臨劇邑。公清終日似閑居。牀頭怪石神仙畫。篋裏華笺將
相書。更欲棲蹤近彭澤。香爐峯下結茅廬。

夏日題老將林亭

百戰功成翻愛靜。侯門漸欲似仙家。牆頭細雨垂纖草。水面風回聚落花。井放轆轤閑浸酒。籠開鸚鵡報
煎茶。幾人圖在淩煙閣。曾不交鋒向塞沙。

南康夜宴東溪留別郡守陸郎中

飄然野客才無取。多謝君侯獨見知。竹葉樽前教駐樂。桃花紙上待君詩。香迷蛺蝶投紅燭。舞拂蒹葭倚
翠帷。明發別愁何處去。片帆天際酒醒時。

言懷

十載聲沈覺自非。賤身元合衣荷衣。豈能得路陪先達。卻擬還家望少微。戰馬到秋長淚落。傷禽無夜不魂飛。平生祇學穿楊箭。更向何門是見機。

錢塘夜宴留別郡守

四方騷動一州安。夜列罇罍伴客歡。鱗栗調高山閣迴。蝦蟆更促海城寒。郝天挺云。江南以木柝警夜曰蝦蟆更。屏間佩響藏歌

妓。幕外刀光立從官。沈醉不愁歸棹遠。曉帆吹上子陵灘。不幸見此世界。猶以爲歡樂耶。

觀江南牡丹

北地花開南地風。寄根還與客心同。羣芳盡怯千般態。幾醉能消一番紅。舉世祇將華勝實。真禪元喻色爲空。近年明主思王道。不許新栽滿六宮。

十五夜與友人對月

每到月圓思共醉。不宜同醉不成歡。一千二百如輪夜。浮世誰能得盡看。

青塚

傾國可能勝效國。無勞冥寞更思回。太真雖是承恩死。祇作飛塵向馬嵬。

古戰場

荒骨潛銷壘已平。漢家曾說此交兵。如何萬古冤魂在。風雨時聞有戰聲。

贈鄭司業

晚學更求來世達。正懷非與百邪侵。古人多在今人口。不合于名不苦心。

上所知

初向衆中留姓氏。敢期言下致時名。而今馬亦知人意。每到門前不肯行。

別鄭仁表

春雷醉別鏡湖邊。官顯才狂正少年。紅燭滿汀歌舞散。美人迎上木蘭船。

自諷

鹿鳴筵上強稱賢。一送離家十四年。同隱海山燒藥伴。不求丹桂卻登仙。

傷賈島

生爲明代苦吟身。死作長江一逐臣。可是當時少知己。不知知己是何人。

再遊西山贈許真師

別後已聞師得道。不期猶在此山頭。昔時霜鬢今如漆。疑是年光卻倒流。

經范蠡舊居

一變姓名離百越。越城猶在范家無。他人不見扁舟意。卻笑輕生泛五湖。

龜山寺晚望

四面湖光絕路歧。鷓鴣飛起暮鐘時。漁舟不用懸帆席。歸去乘風插柳枝。

華山孤松

石罅引根非土力。冒寒猶助岳蓮光。綠槐生在膏腴地。何得無心拒雪霜。

長安寓懷

九衢秋雨掩閑扉。不似千名似息機。貧病卻慙牆上土。年來猶自換新衣。

贈段逸人

長筇自擔藥兼琴。話著名山卽擬尋。從聽世人權似火。不能燒得臥雲心。

言懷

不將高蓋竟煙塵。自向蓬茅認此身。唐祖本來成大業。豈非姚宋是平人。

紱懷

月裏路從何處上。江邊身合幾時歸。十年九陌寒風夜。夢掃蘆花絮客衣。

抒懷

幾出東堂謝不才。便甘閒望故山迴。翻思未是離家久。更有人從外國來。

宮詞

日透珠簾見冕旒。六宮爭逐百花毬。迴看不覺君王去。已聽笙歌在遠樓。

題嘉陵驛

嘉陵路惡石和泥。行到長亭日已西。獨倚欄干正惆悵。海棠花裏鷓鴣啼。

弔萬人塚

兵罷淮邊客路通。亂鴉來去噪寒空。可憐白骨攢孤塚。盡爲將軍覓戰功。

全五代詩卷四十六

前蜀

李搏

搏前蜀王建時人。

漁洋五代詩話。蜀藝文志。裴廷裕蜀中登第。搏以詩賀之。云云。又戲贈云。云。廷裕答詩。有何勞問我成都事。一報君知便納降之句。見廷裕詩中。

賀裴廷裕登第

銅梁千里曙雲開。仙籍新從紫府來。天上已張新羽翼。世間無復舊塵埃。嘉祥果叶君平卜。賀喜須斟卓氏杯。應笑戎藩刀筆吏。至今泥滓曝魚腮。

又戲贈

曾隨流水化凡鱗。安上門前一字新。聞道蜀江風景好。不知何似故園春。

李珣

珣字德潤。梓州人。王衍昭儀舜弦夫人之兄。爲蜀秀才。嘗與賓客有瓊瑤集。

十國春秋。珣以小詞爲後主所賞。有浣溪沙詞。

云。早爲不逢巫峽夜。那堪虛度錦江春。詞家互相傳誦。碧雞漫志。喝馱子調微老云。屯田員外郎馮致。景德三年爲開封府界宿吏。日落忽見三婦人過店前。入西畔古佛堂。敢料其鬼也。攜童王侃就之。延坐飲酒。二十六舅母者請王侃歌送酒。

二女側聽。十四姨者曰何名也。侃對曰。喝馱子。十四姨曰。非也。此曲單州營妓教頭葛大娘所撰新聲。梁祖作四鎮時。駐兵魚臺。值十月二十一日生日。大娘獻之。梁祖令李填詞。付後騎唱之。以押馬隊。因謂葛大娘及戰得勝日。始流傳河北軍中。競唱以押馬隊。故訛曰喝馱子。莊皇入洛。有歌此曲者。謂左右曰。此亦古曲。葛氏但更五七聲耳。李珣瓊瑤集。有鳳臺曲。注云。俗謂之喝馱子。不載何宮調。今世羽調宮有慢句。讀與古不類耳。周密云。李珣歐陽炯俱蜀人。各製南鄉子數首。以誌風土。亦竹枝體也。珣詞云。一歸路近。扣舷歌。采真珠處。水風和。曲岸小橋。山月過。烟深鎖。豆蔻花垂千萬朵。二乘綵舫。過蓮塘。權歌驚起睡鴛鴦。帶香遊女。佯伴笑。爭窈窕。競折團荷。遮晚照。三沙月靜。水烟輕。菱荷香裏。夜船行。綠鬢紅臉。誰家女。遙相顧。緩唱權歌。極浦去。四漁市散。渡船稀。越南雲樹望中微。行客待潮天欲暮。送春浦。愁聽猩猩啼瘴雨。五相見處。晚晴天。刺桐花下。越臺前。暗裏回眸。深屬意。遺雙翠。騎象背人先過水。六攜籠去。采菱歸。碧波風起。雨霏霏。趁岸小船。齊櫂急。羅衣溼。出向桃根樹下立。七登畫舸。泛清波。采蓮時。唱采蓮歌。蘭櫂聲齊。羅袖斂。池光颭。驚起沙鷗八九點。八山果熟。水花香。家家風景。有池塘。木蘭舟上。珠簾卷。歌聲遠。椰子酒傾鸚鵡盃。

漁父歌

水接衡門十里餘。信船歸去臥看書。輕爵祿。慕元虛。莫道漁人只爲魚。避世垂綸不記年。官高爭得似君閑。傾白酒。對青山。笑指柴門待月還。掉警鷗。飛水濺袍。影侵潭面柳垂條。終日醉。絕塵勞。曾見錢塘八月濤。

薛昭蘊

昭蘊王衍時官至侍郎。

浣溪沙曲

紅蓼渡頭秋正雨。印沙鷗跡自成行。整鬢飄袖野風香。不語含嚙深浦裏。幾回愁煞權船郎。燕歸帆盡水茫茫。

魏承班

承班宏夫之子。宏夫爲王建養子。賜姓名王宗弼。封齊王。承班爲駙馬都尉。官至太尉。

春曉曲

寂寂畫堂梁上燕。高卷翠簾橫數扇。一庭春色惱人來。滿地落花紅幾片。愁倚錦屏低雪面。淚滴繡羅金縷線。好天涼月盡傷心。爲是玉郎長不見。
輕歛翠蛾呈皓齒。鶯囀一枝花影裏。聲聲清迴遏行雲。寂寂畫梁塵暗起。玉罌滿掛情未已。促坐王孫公子醉。春風筵上貫珠勻。豔色韶顏矯旖旎。

尹鶚

鶚成都人。事王衍爲翰林校書。累官至參卿。

全唐詩。鶚工小詞。有滿宮花云。月沈沈。人悄悄。一柱後庭香。嬾風流。帝子不歸來。滿地禁花慵掃。離恨多。相見少。何處醉迷三

鳥漏清宮樹子規啼。愁鎖碧窗春曉。蓋傷蜀之亡也。十國春秋。鶚與李珣友善。珣本波斯種。鶚性最狡黠。珣也滑稽。常作詩嘲之。珣名爲頓捐鶚。

春閨怨

暮烟籠薜砌。戟門猶未閉。盡日醉尋春。歸來月滿身。離鞍假繡袂。墜巾花亂綴。何處惱佳人。檀痕衣上新。

樂府

雲雨常陪勝會。笙歌慣逐閒遊。錦里風光應占。玉鞭金勒驂騑。戴月潛穿深曲。和香醉脫輕裘。方喜正同鴛帳。又言將往皇州。每憶良宵公子伴。夢魂長掛紅樓。欲表傷離情味。丁香結在心頭。

劉隱辭

隱辭仕蜀。爲王宗憲掌書記。

十國春秋。王宗憲鎮寧江日。辟劉隱辭爲節度掌書記。宗憲武人。多爲恣橫。隱辭諫不聽。遂詠白鹽山。灩澦詩刺之。云云。宗憲聞而發怒。將殺之。已而舍之。遂遁去。

白鹽山

占斷瞿塘一峽烟。色峯迴出衆峯前。都緣頑梗揜浮世。遮莫崢嶸倚半天。有樹只知引鳥雀。無雲不易駐神仙。假饒突兀高千丈。爭及平平數畝田。

灩澦堆

灩澦崔嵬百萬秋。年年出沒幾時休。未容寸土生纖草。能向當江覆巨舟。無事便騰千丈浪。與人長作一堆愁。都緣不似蟠溪石。難使漁翁下釣鉤。

楊義方

義方蜀山人。

異聞錄。蜀王建時。楊義方能詞。爲春日詩云。海邊紅日半離冰。天外暖風輕到花。贈王樞密云。兩聲鞭自禁門出。一簇人從天上來。十國春秋。義方長于吟咏。自謂才過羅隱。常爲春日詩云。爲人所稱許。後主

時九頭鳥見義方作詩云好惜羽毛還鬼窟莫留災害與蒼生以此爲宋光嗣所害

偶題 一作章

莊詩

亂世時偏促。陰天日易昏。無言搔白首。憔悴倚東門。

蒲禹卿

禹卿成都人。自右補闕出爲秦州節度判官。

十國春秋禹卿會後主東遊上表極諫。及後主被誅禹卿痛哭題詩曰驛門而遁。

題驛門

我王銜璧遂稱臣。何事全家并殺身。漢捨子嬰名尚在。魏封劉禪事猶新。非干大國渾無識。都是中原未有人。獨向長安儘惆悵。力微何路報君親。

鄭藝

藝仕後主爲翰林學士。

十國春秋藝文辭敏贍筆不加點其最著有武德軍節度使趙國公徐延瓊碑銘蜀人往往傳誦焉其銘云云

趙國公徐延瓊碑銘

金行啓運。鼎業鑿乾。麟御瑞紀。鳳舞昌年。層潤浩注。國祚遐延。光凝寶匣。福靄祥編。上詰繼文。皇圖增煥。得一踐義。登三轡漢。懿綱牢籠。大鑑真觀。宗社還資。微明接旦。大虛寥寥。中有元精。麗物爲瑞。麗人爲英。

英芙徐公爲毗而生。脂膏不染。獄市無驚。智勝兵強。化行民附。屢立奇功。繼膺寵數。帝念徐公。聿齊其務。乃騰梓潼。并有饒賦。公至若何。時雨霽霽。枯苗耀穎。涸轍騰波。摧奸禁暴。剔弊止訛。襁負而至。動植興歌。八政何先。以食爲天。臥鼓勸農。免胄服田。耒耜接肘。篳笠摩肩。閭閻風靡。稼穡雲連。衆害旣去。纖惡皆除。頌宣化育。慎恤刑書。徽纆自朽。囹圄常虛。輕徭薄斂。政協蒲蘆。老安少懷。遠至邇肅。風雨時若。家給人足。戶溢版籍。賦登公牘。儲峙孔多。貢輸相屬。神明之正。誰爲之師。公之俱美。福祿攸宜。位隆鳳沼。恩注龍墀。梓人訟德。天子嘉之。爰命荒墟。奉揚馨烈。揚子神疲。江生思絕。涪水東注。銅山西揭。帶礪無期。永旌賢哲。

唐求

求王建時人。

茅亭客話。求居味江山。王建召爲參謀不就。人謂之唐隱居。每入市騎一青牛。至暮醺酣而歸。非其類不與之交。或吟或詠。有所得則將稿撚爲丸。內于大瓢中。二十餘年莫知其數。其贈送寄別之詩。布于人口。

暮年因臥病。索瓢致于江中曰。斯文苟不沈沒于水。後之人得者。方知我苦心耳。漂至新渠江口。有識者云。唐山人詩瓢也。探得之。已遭漂澗損壞。十得其二三。凡三十餘篇。行于世。題鄭處士隱居云。數點石泉雨。一溪霜葉風。贈行如上人云。衲補雲十片。香焚篆一窠。題青城山范賢觀云。苔鋪翠點仙橋滑。松織香梢古道寒。贈僧云。雲間曉月應難染。海上孤舟自任風。夫草澤間有隱逸得志者。以經籍自娛。詩酒怡情。不耀文彩。不揚姓名。其趨附苟且。得無愧赧唐山人乎。全唐詩話。求有詩名。如臨池洗研。恰似有龍深處臥。被人驚起黑雲生。又有漸寒沙上路。欲暝水邊村。亦佳句也。北夢瑣言。求詩思遊歷不出二百里。按求一作球。

曉發

旅館候天曙。整車趨遠程。幾處曉鐘斷。半橋殘月明。沙上鳥猶睡。渡頭人已行。去去古時道。馬嘶三兩聲。

客行

上山下山去。千里萬里愁。樹色野橋暝。雨聲孤館秋。南北眼前道。東西江畔舟。世人重金玉。無金徒遠游。

題鄭處士隱居

不信最清曠。及來愁已空。數點石泉雨。一溪霜葉風。業在有山處。道成無事中。酌盡一尊酒。病夫顏亦紅。

贈著上人

掩門江上住。盡日更無爲。古木坐禪處。殘星鳴磬時。水澆冰滴滴。珠數落纍纍。自有閑行伴。青藤杖一枝。

贈行如上人

不知名利苦。念佛老岷峨。衲補雲千片。香燒印一窠。戀山人事少。憐客道心多。日日齋鐘後。高懸瀘水羅。

送友人歸邛州

鶴鳴山下去。滿篋荷瑤琨。放馬荒田草。看碑古寺門。漸寒沙上雨。欲暝水邊村。莫忘分襟處。梅花撲酒尊。

和舒上人山居卽事

敗葉填溪路。殘陽過野亭。仍彈一滴水。更讀兩張經。暝鳥烟中見。寒鐘竹裏聽。不多山下去。人世盡羶腥。

發邛州寄友人

茫茫驅一馬。自嘆又何之。出郭見山處。待船逢雨時。曉雞鳴野店。寒葉墮秋枝。寂寞前程去。閑吟欲共誰。

舟行夜泊夔州

維舟鏡面中。迴對白鹽峯。夜靜沙堤月。天寒水寺鐘。故園何日到。舊友幾時逢。欲作還家夢。青山一萬重。

山東蘭若遇靜公夜歸

松門一徑微。苔滑往來稀。半夜聞鐘後。渾身帶雪歸。問寒僧接杖。辨語犬銜衣。又是安禪去。呼童閉竹扉。

秋寄舒公

故人何處望。秋色滿江濱。入水溪蟲亂。過橋山路分。鶴歸松上月。僧入竹間雲。莫惜中宵磬。從教夢裏聞。

題楊山人隱居

深山道者家。門戶帶烟霞。綠綴沿巖草。紅飄落水花。半庭栽小樹。一徑掃平沙。往往溪邊坐。持竿到日斜。

友人見訪不值因寄

門戶寒江近。籬牆野樹深。晚風搖竹影。斜日轉山陰。砌覺披秋草。牀驚倒古琴。更聞鄰舍說。一隻鶴來尋。

塗次偶作

歲月客中銷。崎嶇力自招。問人尋野寺。牽馬渡危橋。爲雨疑天晚。因山覺路遙。前程何處是。一望又迢迢。

送友人江行之廬山肄業

蜀國初開棹。廬峯擬拾螢。獸皮裁褥暖。蓮葉製衣馨。楚水秋來碧。巫山雨後青。莫教銜鳳詔。三度到中庭。

贈道者

披霞戴鹿胎。歲月不能催。飯把琪花煮。衣將藕葉裁。鶴從歸日養。松是小時栽。往往樵人見。溪邊洗藥來。

酬友生早秋

彤雲將欲罷。蟬柳響如秋。露散九霄近。日程三伏愁。殘陽宿雨霽。高浪碎沙漚。祛足餘旬後。分襟任自由。

古寺

路傍古時寺。寥落藏金容。破塔有寒草。壞樓無曉鐘。亂紙失經偈。斷碑分篆蹤。日暮月光吐。繞門千樹松。

馬嵬感事

冷氣生深殿。狼星渡遠關。九城鼙鼓內。千騎道途間。鳳髻隨秋草。蠻輿入暮山。恨多留不得。悲淚滿龍顏。

邊將

三千護塞兒。獨自滯邊陲。老向二毛見。秋從一葉知。地寒鄉思苦。天暮角聲悲。卻被交親笑。封侯未有期。

夜上隱屋寺

尋師擬學空。空住虎溪東。千里照山月。一枝驚鶴風。年如流去水。山似轉來蓬。盡日都無事。安禪石窟中。

山居偶作

趨名逐利身。終日走風塵。還到水邊宅。卻爲山下人。僧教開竹戶。客許戴紗巾。且喜琴書在。蘇生未厭貧。

邛州水亭夜讌送顧非熊之官

寂寞邛城夜。寒塘對庾樓。蜀關蟬已噪。秦樹葉應秋。道路連天遠。笙歌到曉愁。不堪分袂後。殘月正如鉤。

題青城山范賢觀

數里緣山不厭難。爲尋真訣問黃冠。苔鋪翠點仙橋滑。松織香梢古道寒。晝傍綠畦薺嫩玉。夜開紅竈撚新丹。鐘聲已斷泉聲在。風動茅花月滿壇。

送僧講罷歸山

休將如意辯真空。吹盡天花任曉風。共看玉蟾三皎潔。獨懸金錫一玲瓏。巖間松桂秋烟白。江上樓臺晚日紅。依舊曹溪念經處。野泉聲在草堂東。

題友人寓居

寓居無不在天涯。莫恨秦關道路賒。繚繞城邊山是蜀。彎環門外水名巴。黃頭卷席賓初散。白鼻嘶風日欲斜。何處一聲金磬發。古松南畔有僧家。

傷張玖秀才

銅梁劍閣幾區區。十上探珠不見珠。卞玉影沈沙草閣。驂騑聲斷隴城孤。入關詞客秋懷友。出戶孀妻曉望天。吳水楚山千萬里。旅魂歸到故鄉無。

題李少府別業

尋得仙家不姓梅。馬嘶人語出塵埃。竹和庭上春烟動。花帶溪頭曉露開。繞岸白雲終日在。傍松黃鶴有時來。何年亦作圍棋伴。一到松間醉一回。

贈楚公

會聞半偈雪山中。貝葉翻時理盡通。般若恆添持戒力。落叉誰算念經功。雲間曉月應難染。海上虛舟自信風。長說滿庭花色好。一枝紅是一枝空。

贈王山人

紅藤一柱腳常輕。日日緣溪入谷行。山下有家身未老。竈前無火藥初成。經秋少見閑人說。帶雨多聞野鶴鳴。知到蓬萊難再訪。問何方法得長生。

庭竹

月籠翠葉秋承露。風亞繁枝暝掃烟。知道雪霜終不變。永留寒色在庭前。

題常樂寺

桂冷香聞十里間。殿臺渾不似人寰。日斜回首江頭望。一片晴雲落後山。

送劉鍊師歸山

風急雲輕鶴背寒。洞天誰道卻歸難。千山萬水瀛洲路。何處烟飛是醮壇。

酬舒公見寄

無客不言雲外見。爲文長遣世間知。一聲松徑寒吟後。正是前山雪下時。

巫山下作

細腰宮盡舊城摧。神女歸山更不來。唯有楚江斜日裏。至今猶自繞陽臺。

杜光庭

光庭字聖賓。括蒼人。應舉不中。入天台山爲道士。僖宗召見。賜以紫服。充麟德殿文章應制。後隱青城山白雲溪。自稱東瀛子。事蜀先主王建爲金紫光祿大夫。封蔡國公。爲太子膺師。遷戶部侍郎。後主立。加傳真天師崇真館大學士。年八十五卒。葬於清都觀。賜號廣成先生。所著有壺中集三十卷。廣成集八十卷。及洞天福地武擔山記。錄異記。陰符經注。東瀛子壩城集仙錄。青城山記。崇道記。混元圖傳受年載記。元門樞要等書。共三十六卷。

十國春秋。光庭文集皆本無爲之。旨有毛仙翁序。作于通正元年三

月辛酉。又瀘州劉真人碑記。青城縣重修冲廟觀碑記。雲昇宮廣雲外尊師碑記。三學山功德碑文。皆光庭所撰。又光庭居恆持驕龍杖一條。紅如猩肉。重如玉石。絕非藤竹所爲。相傳遇仙人留賜云。又僧貫休好俳諧。一日與光庭並轡道中。貫休馬忽奔蹶。光庭連呼大師數珠落地。貫休曰。非數珠乃大還丹耳。光庭有慙色。錦繡萬花谷光庭詠月句云。銅壺滴滴禁漏起。三十六宮爭捲簾。又斜陽古岸歸鴉晚。秋水天低宿雁愁。又霜凋菊徑秋蕪白。雁下遙村落照黃。又恩威欲寄黃丞相。仁信先聞郭細侯。又兵氣此時來世上。文星今日到人間。降因天下思姚宋。出爲儒門繼孔顏。鑿誠錄山居百韻如

丹竈河車休矻矻。蚌胎龜息且綿綿。馭景何時趨日域。騎箕終擬躡星躔。皆可備採。全唐詩話。光庭有贈將軍詩云。八表

順風驚雨露。四溟隨劍息波濤。手扶北極鴻圖遠。雲捲長天聖日高。未會漢家青史上。韓彭何處有功勞。缺首二句。又中條

翠峯峯道上。昇龍化。唐詩云。公贊留衣上玉書。永尊異迹在中條。不知掛漏諸仙否。欲請還丹問作霄。蓋觀中舊有道華

詩有帖裏大還丹。昨宵謾喫卻之句。故云。

紀道德

以下二首俱一言至十五言

道德清虛。元默生帝。先爲聖則。聽之不聞。搏之不得。至德本無爲。人中多自惑。在洗心而息慮。亦知白而守黑。百姓日用而不知。上士勤行而必克。旣鼓鑄於乾坤。品物信充。切乎東西南北。三皇高拱。兮任以自然。五帝垂衣。兮修之不忒。以心體之者爲四海之主。以身彎之者爲萬夫之特。有皓齒青娥者爲伐命之斧。蘊奇謀廣智者爲盜國之賊。曾未若軒后順風。兮清靜自化。曾未若臯陶邁種。兮溫恭允塞。故可以越圓清方濁。兮不始不終。何止乎居九流五常。兮理家理國。豈不聞乎天地於道德也。無以清寧。豈不聞乎道德於天地也。有踰繩墨。語不云乎。仲尼有言。朝聞道夕死可也。所以垂萬古歷百王。不敢離之於頃刻。

懷古今

古今感事傷心。驚得喪。歎浮沈。風駟寒暑。川注光陰。始銜朱顏麗。俄悲白髮侵。嗟四豪之不反。痛七貴以難尋。夸父興懷於落照。田文起怨於鳴琴。雁足淒涼。兮傳恨緒。鳳臺寂寞。兮有遺音。朔漠幽囚。兮天長地久。瀟湘隔別。兮水闊烟深。誰能絕聖韜賢。餐芝餌朮。誰能含光遁世。鍊石燒金。君不見屈大夫。紉蘭而發諫。君不見賈太傅。忌鵬而愁吟。君不見四皓。避秦峨峨。戀商嶺。君不見二疏。辭漢飄飄。歸故林。胡爲乎冒進貪名。踐危途與傾轍。胡爲乎怙權恃寵。顧華飾與雕簪。吾所以思抗跡忘機。用虛無爲模範。吾所以思

去奢滅慾保道德爲規箴。不能勞神效蘇子張生。兮於時而縱辯。不能勞神效楊朱墨翟。兮揮涕以沾襟。

福唐觀

會隨雲水此山遊。行盡層峯更上樓。九月登臨須有意。七年歧路亦堪愁。樹紅樹碧高低影。烟淡烟濃遠近秋。暫熟爐香不須去。佇陪天仗入神州。

平蓋沼

勢壓長江空八陣。吳都仙客此修真。寒江向脫波濤急。深洞無風草木春。江上玉人應可見。洞中仙鹿已來馴。龍車鳳輦非難遇。只要塵心早出塵。

仙居觀

往歲真人朝玉皇。四真三代住繁陽。初開九鼎丹華熟。繼躡五雲天路長。烟鎖翠嵐迷舊隱。池凝寒鏡貯秋光。時從白鹿岩前往。應許潛通不死鄉。

初月

始看東上又西浮。圓缺何曾得自由。照物不能長似鏡。當天多是曲如鉤。定無列宿敢爭耀。好伴晴河相映流。直使奔波急於箭。祇應白盡世間頭。

題鴻都觀

亡吳霸越已功全。深隱雲林始學仙。鸞鶴自飄三蜀駕。波濤猶憶五湖船。雙溪夜月明寒玉。衆嶺秋空歛

翠烟也有扁舟歸去興。故鄉東望思悠然。

題都慶觀

三仙一一駕紅鸞。仙去雲閑遶古壇。煉葯舊臺空處所。掛衣喬木兩摧殘。清風嶺接猿聲近。白石溪涵水影寒。二十四峰皆古隱。振纓長往亦何難。

題鶴鳴山

五氣雲龍下泰清。三天眞客已功成。人間回首天川小。天上凌雲劍佩輕。花擁石壇何寂寞。草平轍跡自分明。鹿裘高士如相遇。不待岩前鶴有聲。

題空明洞

宥然靈岫五雲深。落翮標名振古今。芝朮迎風香馥馥。松檉蔽日影森森。從師祇擬尋司馬。訪道終期謁奉林。欲問空明奇勝處。地藏方石恰如金。

題北平沼

桐柏真人曾此居。焚香厓下誦靈書。朝回時宴三山客。澗盡閑飛五色魚。天柱一峰凝碧玉。神燈千點散紅蕖。寶芝常在知誰得。好駕金蟾入太虛。

題本竹觀

樓閣層層冠此山。雕軒朱檻一躋攀。碑刊古篆龍蛇動。洞接諸天日月閑。帝子影堂香漠漠。真人丹澗水

潺潺掃空雙竹今何在。只恐投波去不還。

題福唐觀

盤空躡翠到山巔。竹殿雲樓勢逼天。古洞草深微有路。舊碑文滅不知年。八州物象通簷外。萬里烟霞在目前。自是人間輕舉地。何須蓬島訪真仙。

題莫公臺

奇絕巍臺峙濁流。古來人號小瀛洲。路通霄漢雲迷晚。洞隱魚龍月浸秋。舉首摘星河有浪。白天圖畫筆無鈎。將軍悟卻希夷訣。贏得清名萬古流。

題龍鵠山

拙得閑身胖瘦筇。亂敲青碧喚蛟龍。道人掃徑收松子。缺月初圓天柱峰。

讀書臺

山中猶有讀書臺。風掃晴嵐畫障開。華月冰壺依舊在。青蓮居士幾時來。

贈人

靜神凝思仰青冥。此夕長天降瑞星。海上昨聞鵬羽翼。人間初見鶴儀形。

贈蜀州刺史

再扶日月歸行殿。卻領山河鎮夢刀。從此雄名壓寰海。八溟爭敢起波濤。

題劍門

誰運乾坤陶冶功。鑄爲雙劍倚蒼穹。題詩曾駐三天駕。礙日長含八海風。

張令問

令問隱居天國山。自號天國山人。

寄杜光庭

試問朝中爲宰相。何如林下作神仙。一壺美酒一爐藥。飽聽松風清晝眠。

黃萬祜

萬祜蜀人

全唐詩話。萬祜修道黔南無人之境。累世常在。每三二十年一出成都賣藥。言人災禍無不神驗。蜀王建迎入宮。盡禮事之。後堅辭歸山。初萬祜辭建歸於所居壁間。願此。後至乙亥年建師東取秦鳳諸州。報捷之際。宮內延火。乃知乙亥是青豬爲焚蕪之期也。後三年歲在戊寅。寅爲鶩獸。干與納音俱爲土。土黃色。故云鶩獸兩頭黃。是年建殂。故天下哭。不差毫髮。

題蜀宮壁

莫教牽動青豬足。動卽炎炎不可撲。鶩獸不欲兩頭黃。黃卽其年天下哭。

楊助

助自號僕射。不知何許人。

十國春秋。助能於空中請自然還丹。其丹立降。又能召九天元女后土夫人經宿而去。後主以其妖妄折其一足。戮之西市。畢命時咏詩。言失國事。不數歲國果亡。唐明宗朝有術

士楊遷卽善使鬼神觸物變化已而被誅蓋助從子也

畢命詩

聖主何曾識仲都。可憐社稷在須臾。市西便是神仙窟。何必乘槎泛五湖。

爾朱先生

先生字通微。號歸元子。成都人。

十國春秋先生唐末隱鍊於金雞關下石室。居久之有異人與藥一丸且戒曰子見浮石而服之仙道成矣。自是遇石必投之水間。視其浮沈人皆笑以爲狂。一日

遊峽上有叟臚舟相待叩其姓氏對曰涪州石姓也。遂豁然悟曰異人浮石之言斯其應乎。因服藥輕舉而去。先生有還丹歌傳于蜀中。全唐詩話有胡二郎者嘗見一道士於成都醉臥通衢二郎憐之每值其醉輒取石支其首道士一日醒見

二郎在傍感之因勸修道且歌以諷之。二郎問爲

何人曰吾卽爾朱先生也。去不見二郎後亦得仙。

示胡二郎歌

欲究丹砂理。幽元無處尋。不離鉛與汞。無出水中金。金欲鍊時須得水。水遇土兮終不起。但知火候不參差。自得還丹微妙旨。人世分明知有死。剛只留心戀朱紫。豈知光景片時間。將謂人生長似此。何不迴心師至道。免逐年光虛自老。臨樽只解醉醺酣。對鏡方知漸枯槁。二郎切切聽我語。仙鄉咫尺無寒暑。與君說盡只如斯。莫戀嬌奢不肯去。感君恩義言方苦。火急迴心求出路。吟成數句贈君辭。不覺便成今與古。

全五代詩卷四十七

前蜀

貫休

貫休字德隱。俗姓姜氏。蘭谿人。七歲出家。天復中入益州。王建禮遇之。署號禪月大師。或呼爲得得來和尚。終於蜀。年八十一。初有西嶽集。吳融爲序。後弟子曇域更名寶月集。

古今詩話貫休唐昭宗以錢武

肅平董昌功拜鎮東軍節度使。自稱吳越國王。貫休投詩曰。貴逼身心不自由。幾年勤苦蹈林邱。滿堂花醉三千客。一劍霜寒十四州。萊子衣裳宮錦窄。謝公篇咏綺霞羞。他年名上凌烟閣。豈羨當時萬戶侯。武肅愛其詩。遣諭令改爲四十州。乃可相見。答曰。州亦難添。詩亦難改。閑雲孤鶴何天不可飛。遂入蜀。休卒于永平二年。云孟誤也。五代史補。僧貫休婺州蘭谿人。有逸才。長於歌詩。嘗遊荆南時。成汭爲荆南節度使。生日有獻歌詩頌德者。僅百餘人。而貫休在焉。汭不能親覽。命幕吏鄭準定其高下。準害其能。輒以貫休爲第三。貫休怒曰。藻鑑如此。其能久乎。遂入蜀。及至。值王建稱藩。因獻之。詩云。一瓶一鉢垂垂老。千水千山得得來。建大悅。遽加禮待。泊僭大號。以爲國師。賜號曰禪月。又大蜀高祖潛龍日。獻詩陳情。偈頌云。有叟有叟。居岳之室。一詩見本集內。郡閣雅談。貫休鍾陵人。精於筆札。荆州成汭問其筆札法。休曰。此事須登壇可授。安可草草而言。成令啣之。乃遞於黔中。因爲病鶴詩。以見意。曰。見說氣清邪不入。不知爾病自何來。十國春秋。貫休復遊江陵。王優禮之。會有謁宿者。言時政不治。乃作酷吏詞以刺之。云。霰雨漚漚云云。王雖疎之。而不甚罪焉。夢溪筆談。溫州雁蕩山。自古圖史不載。按西域書云。阿羅漢諾矩羅居震旦東南大海際。雁蕩山芙蓉龍湫。唐貫休作諾矩羅贊云。雁蕩經行雲。

漠漠龍湫宴坐雨濛濛。此山南有芙蓉峯。下有芙蓉驛。前瞰大海。山頂有大池。相傳以爲雁蕩。有二潭。以爲龍湫。又有經行峽。宴坐峯。皆以貫休詩得名也。又十國春秋。前蜀高祖王建。命貫休誦近詩。時貴戚滿座。貫休欲諷之。乃舉公子行曰。錦衣鮮華。手擎鸚。閑行氣貌多輕忽。稼穡艱難總不知。五帝三王爲何物。高祖稱善。貴倖多怨之。山谷遠法師。居廬山下。持律精苦。過中不受蜜湯。而作詩換酒飲。陶彭澤送客無貴賤。不過虎溪。而與陸道士行。過虎溪數百步。大笑而別。故禪月作詩云。愛陶長官醉兀兀。送陸道士行遲遲。買酒過溪皆破戒。斯何人斯師如斯。故效之云。留陶淵明把酒椀。送陸修靜過虎溪。胸次九流清似鏡。人間萬事醉如泥。野客叢書。魯直詩曰。管城子無食肉相。孔方兄有絕交書。謂此體魯直創見。僕謂不然。唐詩此體甚多。張祜曰。賀知章口徒勞說。孟浩然身更不顧。李益曰。柳吳興近無消息。張長公貧苦寂寥。貫休曰。郭尙父休謬寒北。裴中令莫說淮西。杜荀鶴曰。卷一箔絲供鈎線。種千林竹作漁竿。皆此句法也。法藏碎金。李白廬山東林寺夜懷詩云。天香生虛空。天樂鳴不歇。又貫休山居詩。自古浮華能幾幾。逝波終日去滔滔。漢王廢苑生秋草。吳主荒宮入夜濤。滿屋黃金机不息。一頭白髮氣猶高。豈如知足金仙子。霞外天香滿毳袍。予因思勝境中。當有自然清氣。名曰天香。自然清意。名曰天樂。予故以所聞靈響。目爲天簫。亦取天籟之義。此蓋惟變所適。不可致詰也。茗溪漁隱叢話。東坡云。唐末五代文章衰陋。詩有貫休。書有亞栖。村俗之氣。大率相似。如蘇子美家收藏張長史書云。隔簾歌已俊。對面貌彌精。語既凡惡。而字畫真亞栖之流。近見曾子固編李白詩。有懷素草書歌及笑矣乎數篇。皆貫休以下詞格。元溫日觀畫蒲萄跋。舉世只知嗟逝水。何人微解悟空花。此貫休禪師佳句。元溫日觀書之。爲策勵之端。仍爲寫龍鬚于後。夢溪筆談。貫休富貴曲云。刻成箏柱雁相挨。此下里鸞彈者皆有之。何足道哉。常楚老云。十幅紅綃。夜玉十幅綃。爲帳。方不及四五尺。下知如何伸脚。此所謂不曾近富家兒。西溪叢語。貫休云。栗不和皴落。又新蟬避栗皴。皴卽栗蓬也。全唐詩話。周寶蒞丹陽。州人有事。輒云待錢來。後果以錢鏐代之。故貫休有上錢鏐句云。今日再三難更識。讖辭惟道待錢來。又咏俠客云。黃昏風雨黑。如鑿別。我不知何處去。皆未見全什。錦繡萬花谷。一生不蓄買田錢。華屋何心亦偶然。客至多逢僧在坐。釣歸惟許鶴隨船。

又云家爲買琴添舊價。廚因養鶴減晨炊。又云。
粘粉爲題栖鳳竹。帶香因洗落花泉。皆貫休句。

大蜀高祖潛龍日獻陳情偈頌

有叟有叟居岳之室。忽振金湯。下彼巉崿。聞蜀風景。地寧得一。富人侯王。且爽摩詰。龍角日角。紫氣盤屈。揭日月行。符湯禹出。天步艱難。橫流犯蹕。穆穆蜀俗。整整師律。髯髮垂雪。忠貞貫日。四人蘇活。萬里豐謐。無雨不膏。有露皆滴。有叟有叟。無實行實。一瓶一衲。旣樸且質。幸蒙顧盼。詞煖恩鬱。軒鏡光中。願如善吉。

大蜀皇帝壽春節進堯銘舜頌二首

堯銘

金冊昭昭。列聖孤標。仲尼有言。巍巍帝堯。承天眷命。罔厥矜驕。四德炎炎。堦莫不凋。永孚於休。垂衣飄飄。吾皇則之。小心翼翼。秉陽亭毒。不遑暇食。土堦苔綠。茅茨雨滴。君旣天賦。相亦天錫。德轉金鏡。以聖繼聖。漢高將將。太宗兵柄。吾皇則之。日新德盛。朽索六馬。罔墜厥命。熙熙蓼蕭。塊潤風調。舞擎干羽。囿入芻蕘。旣玉其葉。亦金其枝。葉葉枝枝。百工允釐。享國如堯。不疑不疑。

舜頌

高高歷山。有黍有粟。皇皇大舜。合堯元德。五典克從。四門伊穆。大道將行。天下爲公。臨下有赫。選賢用能。吾皇則之。無斁無逸。綏厥品彙。三光得一。千輻臨頂。十在隨蹕。大哉大同。爲光爲龍。吾皇則之。聖謀隆隆。

納隍孜孜。考考切切。六宗是禋。五瑞斯列。排麟環鳳。披香立雪。四夷納賚。九圍有截。昔救世師。降生竺乾。壽春亦然。萬年萬年。

公子行

錦衣薜華手擎鶻。閑行氣貌多輕忽。稼穡艱難摠不知。五帝三皇是何物。

善哉行

有美一人兮。婉如青揚。識曲別音兮。令姿煌煌。繡袂捧琴兮。登君子堂。如彼萱草兮。使我憂忘。欲贈之以紫玉兮。白銀鐙。久不見之兮。湘水茫茫。

陽春曲

爲口莫學阮嗣宗。不言是非非至公。爲手須似朱雲輩。折檻英風至今在。男兒結髮事君親。須學前賢多慷慨。歷數雍熙房與杜。魏公姚公宋開府。盡向天上仙宮閑處坐。何不卻辭上帝下下土。忍見蒼生苦苦苦。

上留田

父不父兄不兄。上留田。螯賊生。徒陟岡。淚崢嶸。我欲使諸凡鳥雀。盡變爲鵲鴿。我欲使諸凡草木。盡變爲田荆。鄰人歌。鄰人歌。古風清風生。

萬里曲

兔不遲。烏更急。但恐穆王八駿著鞭不及。所以蒿里墳出叢叢。氣凌雲天。龍騰鳳集。盡爲風消土喫。狐撥蟻拾黃金不啼玉不泣。白楊騷屑。亂風愁月。折碑石人莽穢榛沒。牛羊窳宰。時見牧童兒弄枯骨。

臨高臺

涼風吹遠念。使我升高臺。寧知數片雲。不是舊山來。故人天一涯。久客殊未迴。雁來不得書。空寄聲哀哀。

古離別

離恨如旨酒。古今飲皆醉。只恐長江水。盡是兒女淚。伊余非此輩。送人空把臂。他日再相逢。清風動天地。

富貴曲

如神若仙似蘭同雪。樂戒於極。胡不知輟。只欲更綴上落花。恨不能把住明月。太山肉盡。東海酒竭。佳人醉唱敲玉釵折。寧知耘田車水翁。日日炙背欲裂。

野田黃雀行

高樹風多吹爾巢。落深蒿葉暖。宜爾依泊。莫近鴟類。蛛網亦惡。飲野田之清水。食野田之黃粟。深花中睡。埽土裏浴。如此卽全勝啄太倉之穀。而更穿人之屋。

陳宮詞

緬想當時宮闕盛。荒晏椒房蔑堯舜。玉樹花歌百花裏。珊瑚窗中海日迸。大臣來朝酒未醒。酒醒忠諫多不聽。陳宮因此成野田。耕人犁破宮人鏡。

了仙謠

海中紫霧蓬萊島。安期子喬去何早。遊戲多騎白麒麟。鬚髮如銀未曾老。亦留仙訣在人間。齧鏃終言藥非道。始皇不得此深旨。遠遣徐福生憂惱。紫朮黃精心上苗。大還小還行中寶。若師方術棄心師。浪似雪山何處討。

循吏曲 上王使君

需宿需宿。炳爛光合。蒸蒸庶民。鍾此多福。自東自西。自南自北。伊飛伊走。乳乳良牧。和氣無形。春光自成。大信不信。貽厥無朕。需女需女。爾亦須語。使君爲理。元風震古。需女需女。爾亦須語。我願喙長。三千里枕。著玉階奏明主。

塞上曲

去年轉鬪陰山腳。生得單于卻放卻。今年深入于不毛。胡兵拔帳遺弓刀。男兒須一作貴展平生志。爲國輸忠合天地。甲穿雖卽失黃金。劍缺猶能生紫氣。塞草萋萋兵士苦。胡虜如今勿胡虜。封侯十萬始無心。玉

關凱一作生入君看取。

擬君子有所思二首

我愛正考甫。思賢作商頌。我愛揚子雲。理亂皆如鳳。振衣中夜起。露花香綺旒。撲碎驪龍明月珠。敲出鳳

鳳五色髓。陋巷蕭蕭風。枳枳。一作浙浙緬想斯人勝。珪璧寂寥千載不相逢。無限區區盡虛擲。君不見沈約道。

佳人不在茲。春光爲誰惜。

安得龍猛筆。點石爲黃金。

西嶽龍猛大士於硯中磨藥點石成金。西天有龍猛金。其色紫。

散爲酷吏家。使無貪殘心。甘棠密葉成翠幄。款鳳不

來天地塞。所以傾城人。如今不可得。

塞下曲

日向平沙出。還向平沙沒。飛蓬落軍營。驚鷗去天末。帝鄉青樓倚霄漢。歌吹掀天對花月。豈知塞上望鄉人。日日雙眸滴清血。

鼓腹曲

我昔不幸兮。遭百羅。蒼蒼留我兮。到好時。耳聞鐘鼓兮。生豐肌。白髮卻黑兮。自不知。東鄰老人好吹笛。倉囷峨峨穀多赤。餅紅鰕兮枿麩臘。有酒如濁醪兮呼我喫。往往醉倒潢汙之水邊兮。人不識。孰云六五帝兮。四三皇。如夔如龍兮。如龔黃。吾不知此之言兮。是何之言兮。

邊上行

山無綠兮水無清。風旣毒兮沙亦腥。胡兒走馬疾飛鳥。聯翩射落雲中聲。陣雲忽向沙中起。探得胡兵過遼水。堪嗟護塞征戍兒。未戰已疑身是鬼。

義士行

先生先生不可遇。愛平不平眉斗豎。黃昏雨雹空似鬣。別我不知何處去。

戰城南

萬里桑乾傍。茫茫古蕃壤。將軍貌憔悴。撫劍悲年長。胡兵尙陵逼。久住亦非強。邯鄲少年輩。箇箇有伎倆。拖槍半夜去。雪片大如掌。

少年行

自拳五色裘。迸入他人宅。卻捉蒼頭奴。玉鞭打一百。面白如削玉。猖狂曲江曲。馬上黃金鞍。適來新賭得。

夢遊仙

三四仙女兒。身著琴瑟衣。手把明月珠。打落金色梨。車渠地無塵。行至瑤池濱。森森椿樹下。白龍來嗅人。

輕薄篇

繡林錦野春態相壓。誰家少年馬蹄踢踢。鬪雞走狗夜不歸。一擲賭卻如花妾。誰云不顛不狂。其名不彰。悲夫。

酷吏詞

霰雨瀟瀟。風吼如嘶。有叟有叟。暮投我宿。吁歎自語。云太守酷。如何如何。掠脂斡肉。吳姬唱一曲。等閑破紅束。韓娥唱一曲。錦段鮮照屋。寧知一曲兩曲歌。曾使千人萬人哭。不惟哭亦白其頭。飢其族。所以祥風不來和。氣不復。蝗乎。蝻乎。東西南北。

杞梁妻

秦之無道兮。四海枯。築長城兮。遮北胡。築人築土一萬里。杞梁貞婦啼嗚嗚。上無父兮。中無夫。下無子兮。孤復孤。一號城崩。塞色苦。再號杞梁骨出土。疲魂飢魄相逐歸。陌上少年莫相非。

長安道

憧憧合合。八表一轍。黃塵霧合。車馬火熱。名湯風雨。利輾霜雪。千車萬馱。半宿關月。上有堯禹。下有夔高。紫氣銀輪兮。常覆金闕。仙掌捧日兮。濁河澄澈。愚將草木兮。有言與華。封人兮。不別。

洛陽塵

昔時昔時洛城人。今作茫茫洛城塵。我聞富有石季倫。樓臺五色千星辰。樂如天樂。日夜聞。錦姝繡妾何紛紛。真珠簾中姑射神。人文金線玉香成。暮雲孫秀若不殺。晉室應更貧。伊水削行路。塚石花磷磷。蒼茫金谷園。牛羊齧荆榛。飛鳥好羽毛。疑是綠珠身。

茫茫曲

茫茫復茫茫。滿眼皆埃塵。莫言白髮多。莖莖是愁筋。未達苦雕僞。及達多不仁。淺深與高低。盡能生棘榛。

茫茫四大愁殺人。

白雪曲

列鼎佩金章。淚眼看風枝。卻思食藜藿。身作屠沽兒。負米無遠近。所希升斗歸。爲人無貴賤。莫學雞狗肥。斯言如不忘。別更無光輝。斯言如或忘。卽安用人爲。

古鏡詞

我有一面鏡。新磨似秋月。上唯金膏香。下狀驪龍窟。等閑不欲開。醜者多不悅。或問幾千年。軒轅手中物。

塞上曲

錦袷胡兒黑如漆。騎羊上冰如箭疾。蒲萄酒白雕臘紅。首宿根甜沙鼠出。單于右臂何須斷。天子昭昭本如日。一握鬢髯一握絲。須知只爲平戎術。

行路難

君不見道傍廢井生古木。本是驕奢貴人屋。幾度美人照影來。素綆銀餅濯纖玉。雲飛雨散今如此。繡闥雕甍作荒谷。沸渭笙歌君莫誇。不應常是西家哭。休說遺編行者幾。至竟終須合天理。敗他成此亦何功。蘇張終作多言鬼。行路難。行路難。不在羊腸裏。

君不見道傍樹有寄生枝。青青鬱鬱同榮衰。無情之物尙如此。爲人不及還堪悲。父歸墳兮未朝夕。已分黃金爭田宅。高堂老母頭似霜。心作數支淚常滴。我聞忽如負芒刺。不獨爲君空歎息。古人尺布猶可縫。

潯陽義犬令人憶。寄言世上爲人子。孝義團圓莫如此。若如此不遑死兮更何俟。君不見山高海深入不測。古往今來轉青碧。淺近輕浮莫與交。地卑只解生荆棘。誰道黃金如糞土。張耳陳餘斷消息。行路難行路難君自看。

不會當時作天地。剛有多般愚與知。到頭還用真宰心。何如上下皆清氣。大道冥冥不知處。那堪頓得義和轡。義不義兮仁不仁。擬學長生更容易。負心爲鑪復爲火。緣木求魚應且止。君不見燒金煉石古帝王。鬼火熒熒白楊裏。

九有茫茫共堯日。浪死虛生亦非一。清淨元音竟不聞。花眼酒腸暗如漆。或偶因片言隻字登第光。二親又不能獻可替否航要津。口譚羲軒與周孔。履行不及屠沽人。行路難行路難。日暮途遠空悲歎。

胡無人

霍嫖姚趙充國。天子將之平朔漠。肉胡之肉。燼胡帳幄。千里萬里。唯留胡之空殼。邊風蕭蕭。榆葉初落。殺氣晝赤。枯骨夜哭。將軍旣立殊勳。遂有胡無人曲。我聞之天子。富有四海。德被無垠。但令一物得所。八表來賓。亦何必令彼胡無人。

古塞下曲

古塞腥膻地。胡兵聚如蠅。寒鷗中礮石。落在黃河冰。蒼茫邏遼城。枿枿賊氣興。鑄金禱秋穹。還擬相憑陵。白骨殘成塵。飛入征人目。黃雲忽變黑。戰鬼作陣哭。陰風吼大漠。火號出不得。誰爲天子前。唱此邊城曲。

古意

一雨火雲盡。閉門心冥冥。蘭花與芙蓉。滿院同芳馨。佳人天一涯。好鳥何嚶嚶。我有雙白壁。不羨于虞卿。我有徑寸珠。別是天地精。玩之室生白。瀟洒身安輕。只應天上人。見我雙眼明。

陽鳥爍萬物。草木懷春恩。茫茫塵上飛。培壅名利根。我本是蓑笠。幼知天子尊。學爲毛氏詩。亦多直致言。不慕需臚類。附勢同崩奔。唯尋桃李蹊。去去長者門。

美人如遊龍。被服金鴛鴦。手把古刀尺。在彼白玉堂。文章深掣曳。珂佩鳴丁當。好風吹桃花。片片落銀床。何妨學羽翰。遠逐朱鳥翔。

乾坤有清氣。散入詩人脾。聖賢遺清風。不可惡木枝。千人萬人中。一人兩人知。憶在東溪日。花開葉落時。幾擬以黃金。鑄作鍾子期。

莫輕白雲白。不與風雨會。莫見守羊兒。或是初平輩。人生非日月光。輝豈常在。一榮與一辱。古今常相對。不見于公門。子孫好冠蓋。

古交如真金。百煉色不回。今交如暴流。儻忽生塵埃。我願君子氣。散爲青松栽。我恐荆棘花。只爲小人開。傷心復傷心。吟上高高臺。

常思謝康樂。文章有神力。是何清風清。凜然似相識。一種爲頑嚚。得作翻經石。一種爲枯槁。得作登山屐。永嘉爲郡後。山水添鮮碧。何當學羽翰。一去觀遺跡。

憶在山中時。丹桂花葳蕤。紅泉浸瑤草。白日生華滋。箬屋開地罅。翠牆挂藤衣。看經竹窗邊。白猿三兩枝。東峯有老人。眼碧頭骨奇。種殫煮白石。旨趣如嬰兒。月上來打門。月落方始歸。授我微妙訣。恬澹無所爲。別來六七年。只恐白日飛。

擬齊梁酬所知見贈

美如仙鼎金。清如織手琴。孫登嘯一聲。縹緲不可尋。但覺神洋洋。如入三昧林。釋手復在手。古意深復深。慚無英瓊瑤。何以酬知音。

清氣生滄洲。殘雲落林藪。放鶴久不歸。不知更歸否。支策到江湄。江臯木葉飛。自憐爲客遠。還如鶴遶枝。南枝復北枝。玉露沾毛衣。

靜只焚香坐。詠懷悲歲闌。佳人忽有贈。滿手紅瑯玕。不獨耀肌魄。將行爲羽翰。酬如上青天。風雪空漫漫。果熟無低枝。芳香入屏幄。故人久不來。萱草何離離。苦吟齋貌減。更被杉風吹。獨賴湖上翁。時爲烹露葵。

擬齊梁體寄馮使君三首

庭鳥多好音。相呼灌木中。竹房更何有。便如鳥巢空。賴逢故人侯。真東晉謝公。煌煌發令姿。珂珮鳴丁冬。故山有深霞。未如旌旗紅。慚非衛霍松。何以當清風。

露益蟬聲長。蕙蘭垂紫帶。清吟待明月。孤雲忽爲蓋。伊余石林人。本是燒畬輩。頻接謝公棋。輸多未曾賽。大道貴無心。聖賢爲始慕。秋空共澄潔。美玉同貞素。偉哉桐江守。雌黃出金口。爲文能廢興。談道弭空有。

雪林槁枯者。坐石聽亦久。還疑紫磨身。成居靈運後。

偶作

誰信心火多。多能焚大國。誰信鬚上絲。莖莖出蠶腹。嘗聞養蠶婦。未曉上桑樹。下樹畏蠶飢。兒啼亦不顧。一春膏血盡。豈止應王賦。如何酷吏酷。盡爲搜將去。蠶蛾爲蝶飛。僞葉空滿枝。冤梭與恨機。一見一霑衣。君子稱一善。馨香遍九垓。小人妬一善。處處生嫌猜。口如暴死人。鐵尺拗不開。稂莠蝕田髓。積陰成冬雷。因知咋舌人。千古空悠哉。新詩一千首。古錦初上機。除月與鬼神。別未有人知。子期去不返。浩浩良不悲。不知天地間。知者復是誰。門前數枝路。路路車馬鳴。名埃與利塵。千里萬里行。只見青山高。豈知青山平。朱門勢峩峩。冠蓋何光明。黃鳥在花裏。青蟬奪其聲。爾生非金玉。豈常貴復貞。寄言之子心。可以歸無形。

遇葉進士

文章擬真宰。儀冠冷如壁。山寺偶相逢。眼青勝色山。氣隆多慷慨。語澹無他力。金繩殘果落。竹閣涼雨滴。自媿龍鍾人。見此冲天翼。

寄杜使君

清晨捲珠簾。盥漱香滿室。杉松經雪後。別有精彩出。琅函芙蓉書。開之向塔日。好鳥常解來。孤雲偶相失。有時作章句。氣概還鮮逸。茫茫世情事。誰人愛真實。清高慕元度。宴默攀道一。殘磬隔風林。微陽解冰筆。

亦知休明代諒無經濟術門前九箇峯終擬爲文乞

書陳處士陶屋壁二首

有叟傲堯日。髮白肌膚紅。妻子亦讀書。種蘭清溪東。白雲有奇色。紫桂含天風。卽應迎鶴書。肯羨於洞洪。高步前山前。高歌北山北。數載賣柑橙。山貲近云足。新詩不將出。往往僧乞得。唯云李太白。亦是偷桃賊。吟狂鬼神走。酒醺天地晏。青芻生階除。擷之束成束。

寄王滌

梅月多開戶。衣裳潤欲滴。寂寥雖無形。不是小讐敵。地虛草木壯。雨白桃李赤。永日無人來。庭花苦狼籍。吟高好鳥覷。風靜茶烟直。唯思菜子來。衣拖五般色。

上杜使君

爲魚須處海。爲木須在岳。一登君子堂。頓覺心寥廓。右聽青女鏡。左聽宣尼鐸。政術似蒲盧。詩情出冲漠。從來苦清苦。近更加澹薄。訟庭何所有一隻兩隻鶴。煙霞色擁牆。禾黍香侵郭。嚴霜與美雨。皆從二天落。蒼生苦瘡痍。如何盡消削。聖君新雨露。更作誰恩渥。卽捉五色筆。密勿金鑾角。卽同房杜手。把乾坤橐籥。休說卜圭峯。開門對林壑。

上裴大夫

我有白雲琴。樸斲天地精。俚耳不使聞。慮同衆樂聽。指指法仙法。聲聲聖人聲。一彈四時和。再彈中古清。

庭前梧桐枝。颯颯南風生。還希師曠懷。見我心不輕。

上盧少卿覓千文

荆山有美玉。含華尙炳爛。堪爲聖君璽。堪爲聖君案。草木潤不彫。烟霞覆不散。野人到山下。仰視星辰畔。倘或如栗黃。保之上霄漢。

謝盧少卿惠千文

廬山有石鏡。高倚無塵垢。晝景分烟蘿。夜魄侵星斗。苞含物象列。搜照魚龍吼。寄謝天地間。毫端皆我有。

讀唐史

我愛李景伯。內宴執良規。君臣道昭彰。天顏終熙怡。大箴怕清風。糠粃繚亂飛。洪鑪烹五金。黃金終自奇。大哉爲忠臣。捨此何所之。

上顧大夫

碧海漾仙洲。驪珠外無寶。一岳倚青冥。羣山盡如草。君侯聖朝瑞。動只關元造。誰云倚天劍。含霜在懷抱。誰云青雲險。門前是平道。洪民亦何幸。里巷清如掃。至化無經綸。至神無祝禱。卽應炳文柄。孤平去浩浩。卽應調鼎味。比屋堪封保。野人慕正化。來自海邊島。經傳髻裏珠。詩學池中藻。閉門十餘載。庭杉共枯槁。今朝投至鑒。得不傾肝腦。斯文如未精。歸山更探討。

寄令狐郎中

雨打繁暑盡。放懷步微涼。綠苔狂似人。入我白玉堂。暫鳥眠堪畫。庭檉夜益香。惟應菜宮子。時到虎溪傍。

聞無相道人順世四首

自昔尋師日。顛峯絕頂頭。雖聞不相似。特地使人愁。庭樹雪催殘。上有白獼猴。大哉法中龍。去去不可留。常思將道者。高論地罽傍。迂談無世味。夜深山木僵。下山遭離亂。多病惟深藏。一別三十年。烟水空茫茫。石霜既順世。吾師亦不住。杉桂有猩猩。糠粃無句句。上肥多孟蕨。道老如嬰孺。莫比優曇花。斯人更難遇。百千萬億偈。其他勿交涉。所以那老人。密傳與迦葉。吾師得此法。不論劫不劫。去矣不可留。無蹤若爲躡。

贈許徵君

晝公友秦奚。來往蹋溪雲。如今又到我。還愛許徵君。落花鳥銜來。永日香氤氳。終期將爾曹。歸去麋鹿羣。

全五代詩卷四十八

前蜀

貫休二

古意

常思李太白。仙筆驅造化。元宗致之七寶床。虎殿龍樓無不可。一朝力士脫靴後。玉上青蠅生一箇。紫皇殿前五色麟。忽然掣斷黃金鎖。五湖大浪如銀山。滿船載酒搥鼓過。賀老成異物。顛狂誰敢和。寧知江邊墳。不是猶醉臥。

古意代友人投所知

青松雖有花。有花不如無。貧井泉雖清。且無金轆轤。客從遠方來。遺我古銅鏡。挂之玉堂上。如對軒轅聖。天龍睡坤腹。土蝕金鬣綠。因知燕趙佳人顏似玉。不得此鏡終不出。

偶作

機生機。巧生巧。心鑊烘烘日煎炒。闖蜀眉。嚙遊海島。扶桑椹。熟金烏飽。金烏飽。飛復飛。四天下。人眼眙眙。孰云我輕薄。石頑如何喚作玉。孰云我是非。隨邪逐惡。又爭得。古人終不事悠悠。一言道合死卽休。豈不見大鵬點翼蓋十洲。是何之物鳴啾啾。

君子食卽食。何必在珍表。小人食不食。縱食如泥沙。清歌且莫唱。妙舞亦休誇。爾非鳳炙麒麟肉。焉能一挂於齒牙。去來去來歸去來。紅泉正洒芙蓉霞。

君不見金陵風臺月榭烟霞光。如今五里十里野火燒茫茫。君不見西施綠珠顏色何傾國。樂極悲來留不得。君不見漢王力盡得乾坤。如何秋雨灑廟門。銅臺老樹作精魅。金谷野狐多子孫。幾許繁華幾更改。唯有堯舜周召邱軻似長在。坐看樓閣成邱墟。莫話桑田變成海。吾有清涼雪山雪。天上人間常皎潔。茫茫慾火欲燒人。惆悵無因爲君說。

漁家

赤蘆蓋屋低壓恰。沙漲柴門水浪疊。黃雞青犬花蒙籠。漁女漁兒掃風葉。有叟相逢帶秋醉。自拔船楫色無愧。前山腳下得魚多。惡浪堆中盡頭睡。但得忘筌心自樂。肯羨前賢釣清渭。終須畫取挂秋堂。與爾爲鄰有深意。

田家作

田家老翁無可作。晝甑蒸梨香漠漠。只向塔前曝背眠。赤桑大葉時時落。古塹侵門桃竹密。倉囤峨峨欲遮日。自云孫子解耕耘。四五年來腹多實。我聞此語心自悲。世上悠悠豈得知。稼而不穡徒爾爲。

甘雨應祈

春雨偶愆期。草木亦未覺。君侯不遑處。退食或閉閣。東海浪滔滔。西江波漠漠。得不願身爲大虬。金其角。

玉其中。一吸再呷。雲平霧匝。華暢九有。清傾六合。使不蘇者蘇。不足者足。情通上元。如膏綿綿。有叟有叟。鼓腹歌於道邊。歌曰。黍苗芃芃兮。鶴鷓飛。日出而作兮。日入歸。如彼草木兮。雨露肥。古人三樂兮。我樂多之。天之成兮。地之平兮。柘系黃兮。瓠葉青兮。乳女啼兮。蒸黍馨兮。炙背捫虱兮。復何經營兮。

對月作

今人看此月。古人看此月。如何古人心。難向今人說。古人求祿以及親。及親如之何。忠孝爲朱輪。今人求祿惟庇身。庇身如之何。惡木多斜文。斜文復斜文。顛躓何紛紛。

江邊祠

松森森。江渾渾。江邊古祠空閉門。精靈應醉社日酒。白龜咬斷菖蒲根。花殘冷紅。宿雨滴土龍甲溼。鬼眼赤天符。早晚下空碧。昨夜前村行霹靂。

觀懷素草書歌

張顛顛。後顛非顛。直至懷素之顛始是顛。師不譚經不說禪。筋力唯於草書朽。顛狂卻恐是神仙。有神助兮人莫及。鐵石畫兮墨須入。金尊竹葉數斗餘。半斜半傾山衲溼。醉來把筆獰如虎。粉壁素屏不問主。亂拏亂抹無規矩。羅刹石上坐。伍子胥。崩騰兮不可止。天機暗轉鋒鋞裏。閃電光邊霹靂飛。古柏身中淖龍死。駭人心兮目眩暎。頓人足兮神辟易。乍如沙場大戰後。斷槍檄箭皆狼籍。又似深山怪石上。古病松枝掛鐵錫。月兔筆。天竈墨。斜鑿黃金側。剉玉珊瑚。枝長大如束天馬。驕獰不可勒。

東卻西南又北倒。又起斷復續。忽如鄂公喝。住單雄信。秦王肩上剔著棗木槩。懷素師。懷素師。若不是星辰降瑞。卽必是河岳孕靈。固宜須冷笑逸少。爭得不心醉伯英。天台古杉一千尺。崖崩劓折何崢嶸。或細微仙衣半拆金線垂。或妍媚桃花半紅公子醉。我恐山爲墨兮磨海水。天與筆兮書大地。乃能略展狂僧意。常恨與師不相識。一見此書空歎息。伊昔張渭任華葉季良數子贈歌詩。豈虛飾所不足者。渾未曾道著其神力。石橋被燒卻。良玉不土蝕。雖畫沙兮印印泥。世人世人爭事測。知師雄名在世間。明月清風有何極。

杜侯行并序

愚自江東兵荒之後。受杜氏兄弟深知。往曾見陳陶與撫州蔡京使君雜言曰。蔡氏行。今亦擬之曰杜侯行云耳。

天目連天搏秀氣。崢嶸作起新城地。德門鍾秀光盛時。三虎八龍皆世瑞。頃者天厯亂。下鯨翻海。烽火崩騰。照行在江表。惟傳君子營。劍衝牛斗。疏真宰。金昆玉季。輕三鼓。煮海懸魚。臣節苦。雁影參差入瑞烟。荆花燦爛開仙圃。我聞大中咸通真令主。相惟大杜兼小杜。但能致君活國濟生人。亦何必須踏金梯折桂樹。宣宗懿宗調舜琴。大杜小杜爲殷霖。出將入相兮功德深。生人受賜兮直至今。杜侯兄弟繼之後。璞玉渾金美騰口。常言一呼百萬何足云。終取封侯之印大如斗。恭聞吾皇似堯禹。搜索賢良皆面覩。杜侯杜侯。君倘修令德。克有終。卽必還爲大杜兼小杜。人之戴兮天筆註。國之福兮天固祚。四海無波八表臣。如

今而後君看取

山中作

山爲水精宮。藉花無塵埃。狂吟岳似動。筆落天瓊瓌。伊余自樂道。不論才不才。有時鬼笑兩三聲。疑是大謝小謝李白來。

晉光大師草書歌

雪壓千峯橫枕上。窮困雖多還激壯。看師逸蹟兩相宜。高適歌行李白詩。海上驚驅山猛燒。吹斷狂烟著沙草。江樓曾見落星石。幾回試發將軍砲。別有寒鷗掠絕壁。提上元猿更生力。又見吳中磨角來。舞槩盤刀初觸擊。好文天子揮宸翰。御製本多推玉案。晨開水殿教題壁。題罷紫衣親寵錫。僧家愛詩自拘束。僧家愛畫亦局促。唯師草聖藝偏高。一掬山泉心便足。

書匡山老僧菴

篔簹紅實好鳥語。銀髯瘦僧貌如祖。香烟濛濛衣上聚。冥心縹緲入鐵圉。白麈作夢枕藤屨。東峯山媪貢瓜乳。

讀顧况歌行

雪泥露金冰滴瓦。楓檉火著僧留坐。忽覩逋翁一軸歌。始覺詩魔辜負我。花飛飛。雪霏霏。三珠樹曉珠纍纍。妖狐爬出西子骨。雷車拶破織女機。憶昔鄱陽寺中見一碣。逋翁詞兮逋翁札。庾翼未伏王右軍。李白

不知誰擬殺。別別若非仙。眼應難別。不可說。不可說。離亂離應打折。

讀離騷經

湘江濱。湘江濱。蘭紅芷白波如銀。終須一去呼湘君。問湘君。雲中君。不知何以交靈均。我恐湘江之魚兮。死後盡爲人。曾食靈均之肉兮。箇箇爲忠臣。又想靈均之骨兮。終不曲。千年波底色如玉。誰能入水少取得香沐。函題貢上國。貢上國。卽全勝和璞。懸瓊垂棘結綠。

還舉人歌行卷

厚於鐵圍山上鐵。薄似雙成仙體纈。蜀機鳳雛動蹙蹙。珊瑚枝枝撐著月。王愷家中藏難掘。顏回飢僝愁天雪。古松直筆雷不折。雪衣女啄蟠桃缺。珮入龍宮步遲遲。繡簾銀殿何參差。卽不知驪龍失珠知不知。

春晚書山家屋壁二首

柴門寂寂黍飯馨。山家烟火春雨晴。庭花濛濛水泠泠。小兒啼索樹上鶯。

水香塘黑蒲森森。鴛鴦鷓鴣如家禽。前村後壟桑柘深。東鄰西舍無相侵。蠶娘洗繭前溪淥。牧童吹笛和衣浴。山翁留我宿又宿。笑指西坡瓜豆熟。

懷張爲周朴

張周二夫子。詩好人太癖。更不過嶺來。如今頭盡白。人傳禹力不到處。河聲流向西。周又到處卽閉戶。逢君方展眉。張不知是不是。若是卽大奇。我又聞二公心與人不同。一生常在寂寞中。有時狂吟入僧宅。錦

囊鳥啼荔枝紅。有時冥搜海山腦。珊瑚枝動日杲杲。聖君在上知不知。赤面濁醪許多好。

寒日送元道士入天台

之子逍遙塵世薄。格淡於雲語如鶴。相見惟談海上山。碧側青斜冷相杳。芒鞋竹杖寒凍時。玉霄忽去非有期。僮擔赤籠密雲裏。世上無人留得之。想入紅霞路深邃。孤峰縱嘯仙飈起。星精聚觀泣海鬼。月湧薄烟花點水。送君丁寧有深旨。好尋佛窟遊銀地。佛窟銀地皆天台雲境也。雪眉衲僧皆正氣。伊昔貞白先生同此意。若得

神聖之藥卽莫忘。遠相寄。

送顯雅禪師

霜鋒櫛石鳥雀聚。帆凍陰飈吹不舉。芬陀利香釋麟虎。幡幢冒雪爭迎取。春光主。芙蓉堂窄堆花乳。手提金桴打金鼓。天花娉婷下如雨。狻猊座上獅子語。苦卻樂。樂卻苦。壚至黃金忽如土。

送楊秀才

北山峨峨香拂拂。翠漲青奔勢巉崒。赤松君宅在其中。紫金爲墻珠作室。玻璃門外仙葵睡。幢節森森絳烟密。水精簾捲桃花開。文錦娉婷衆非一。撫長離。坎答鼓。花姑吹簫弄玉起舞。三萬八千爲半日。海涸鼈枯等閒覩。愛共安期棋。苦識彭祖丹。有時朝玉京。紅雲擁金虎。石橋亦是神仙柱。白鳳飛來又飛去。五雲縹緲羽翼高。世人仰望心空勞。

別杜將軍

伊余本是胡爲者。採葦鋤茶在窮野。偶披蓑笠事空王。餘力爲文擬何謝。少年心在青雲端。知音滿地皆龍鸞。遽逢天步艱難日。深藏溪谷空長歎。偶出重闈遇英哲。留我江樓經歲月。身儂玉帳香滿衣。夢歷金盆金華山最高處。雨和雪。東風來兮歌式微。深雲道人召來歸。燕辭大廈兮將何爲。濛濛花雨兮鶯飛飛。一汀楊柳同依依。

春野作

牛兒小。牛女少。拋牛沙上鬪百草。鉏隴老人又太老。薄烟漠漠覆桑棗。

泊秋江

岸如洞庭山似剡。船漾清溪涼勝簟。月白風高不得眠。枯葦叢邊釣師斃。

嘲商客

葦蕭蕭。風撼撼。落日江頭何處客。斜倚帆檣不喚人。五湖浪向心中白。

深山逢老僧二首

納衣線。麈心似月。自把短鋤鋤檣柁。青石溪邊踏葉行。數片雲隨兩眉雪。山童貌頑名乞乞。放火燒畚采厓蜜。擔頭何須帶山香。一籬白葦一籬栗。

懷二三朝友

傷心復傷心。流光似飛電。有惠驪龍十斛珠。不如一見君子面。愁人復愁人。滿眼皆埃塵。有惠黃金一萬斤。不如一見仁人身。我昔讀詩書。如今盡拋也。只記得田叔孟溫舒。帝王滿口稱長者。

宿深村

行行一宿深村裏。雞犬豐年鬧如市。黃昏見客合家喜。月下取魚戽塘水。

送越將歸會稽

面如玉盤身八尺。燕語清獰戰袍窄。古嶽龍腥一匣霜。江上相逢雙眼碧。冉冉春光方婉婉。黯然別我歸稽巘。他年必帥邯鄲兒。與我殺輕班定遠。

樵叟

樵父貌飢帶塵土。自言一生苦寒暑。擔頭擔箇赤瓷罌。斜陽獨入濛籠塢。

寄高員外

冷冽蒼黃風似劈。雪骨冰筋滿瑤席。庭松流汗相抵喫。霜絮重裘火無力。孤峰地鑪燒白櫪。龐眉道者應相憶。倏忽維陽歲云暮。寂寥不覺成章句。惟應將寄藥珠宮。禪刹雲深一來否。

苦熱寄赤松道者

天雲如燒人如炙。天地鑪中更何適。蟬喘雷乾冰井融。些子清風有何益。守羊真人聃之役。高吟招隱倚

碧壁紫氣紅烟鮮的的。澗茗園瓜麩塵色。驕冷奢涼合相憶。

村行遇獵

獵師紛紛走榛莽。女亦相隨把弓矢。南北東西盡殺心。斷燒殘雲在園裏。鶻拂荒田兔成血。竿打黃茅雉驚起。傷嗟箇輩亦是人。一生將此關身己。我聞天地之大德曰生。又聞萬事皆天意。何遣此人又如此。猶更願天公一丈雪。深山麋鹿盡凍死。

經曠禪師院

吾師楞伽山中人。氣岸古淡僧麒麟。曹溪老兄一與語。金玉聲利泥棄唾。委兀兀如頑雲。驪珠兮固難價。其價靈芝兮何以根其根。真貌枯槁言樸略。衲衣爛黑燒嶽痕。憶十四五年前苦寒節。禮師問師楞伽月。此時師握玉麈尾。報我卻云非日月。一敲粉碎狂性歇。庭松無韻冷撼骨。搔窗擦簷數枝雪。邇來流浪于吳越。一片閑雲空皎潔。再來尋師已蟬蛻。蒼蘂枝枯醴泉竭。水檀香火遺影在。甘露松枝月中折。寶師往日真隱心。今日不能墮雙血。

送僧入馬頭山

馬頭寶峰秀塞寒空。有叟有叟真隱其中。無味醍醐亦非般若。白趾碧目數百瀟灑。苦竹大於杉。白熊臥如馬。金鐘撼壑布水噴瓦。芙蓉堂開峰月入岳。精蹋雪立屋下。伊余解攀緣。已是非常者。更有叟獨往來。與我語。情無剛彊。氣透今古。竹笠援補。芒鞋藤乳。北風倒人。乾雪不聚。滿頭霜雪。湯雪去。湯雪去。無人及。

空望真氣江上立

和楊使君遊赤松山

爲郡三星無一事。龔黃意外扳喬松。日邊揚歷不爭路。雲外苔蘚須留蹤。溪月未落漏滴滴。竿旛已入山重重。捫蘿蓋輸山屐伴。駐旆不見朝霞濃。乳猿劇黠挂險樹。露本翠脆生諸峰。初平謝公道非遠。黯然物外心相逢。石羊依稀齧瑤草。桃花彷彿開仙宮。終當歸補吾君袞。好山好水那相容。

秋夜曲

蟋蟀切切風騷騷。芙蓉噴香蟾蜍高。孤燈耿耿征婦勞。更深撲落金錯刀。

送盧舍人

勸君不用登峴首山。讀羊祜碑。男兒事業須自奇。此碑山頭如日月。日月照人人不知。人不知。青山白雲徒爾爲。

勸君登商山。不用覓商山皓。雲深雪深驟馬倒。我願終南太華變爲金吾后。見之不爲寶。我願九州四海紙幅幅。與君爲諫草。使躡嵩踐夔。逢軒見皞。日環五色。是物得老。如此卽商山皓。商山皓。君不用討他。他必來相討。

全五代詩卷四十九

前蜀

貫休三

壽春進祝聖七首

九天宮上聖。降世共昭回。萬彙須亭毓。羣仙送下來。承乾當否極。庶事盡康哉。祇有羲軒比。其餘不可陪。
千載
降祥。

武宿與文星。常如掌上擎。孫吳機不動。周召事多行。旰食爐烟細。宵衣隙月明。還聞夔進曲。吹出泰階平。
文有
武備。

及雷龍鱗動。君臣道義深。萬年軒后鏡。一片漢高心。北狄皆輸款。南夷盡貢琛。從茲千萬歲。枝葉玉森森。
從諫
如流。

俟時兼待價。垂棘出塵埃。仄席三旌切。移山萬里來。烟霞衣上落。閶闔雪中開。壽酒今朝進。無非出世才。
搜揚
草澤。

天將興大蜀。有道遂君臨。四塞同諸子。三邊共一心。閣婆香似雪。迴鶻馬如林。曾讀前皇傳。巍巍冠古今。
守在四夷。

瞳瞳懸佛日。天俟動雲韶。縫掖諸生集。麟洲羽客朝。非烟生玉砌。御柳吐金條。擊壤翁知否。吾皇卽帝堯。

大興三教。

聲教無爲日。山呼萬歲聲。隆隆如谷響。合合似雷鳴。翠拔爲天柱。根盤倚鳳城。恭惟千萬歲。歲歲致昇平。

山呼萬歲。

送諫官南遷

危行危言者。從天落海涯。如斯爲遠客。始是好男兒。瘴雜交州雨。犀揩馬援碑。不知千萬里。誰復識辛毗。

觀李翰林真

誰氏子丹青。毫端曲有靈。屹如山忽墮。爽似酒初醒。天馬難攏勒。仙房久閉扃。若非如此輩。何以傲彤庭。

晚泊湘江作

烟浪濛秋色。高吟似有鄰。一輪湘渚月。萬古獨醒人。岸溼穿花遠。風香禱廟頻。祇應諛佞者。到此不傷神。

淮上逢故人

故園離亂後。十載始逢君。長恨南熏奏。尋常只自聞。荒窗秋見岳。赤地夜生雲。莫歎謀身晚。中興正用文。

讀杜工部集

造化拾無遺。惟應杜甫詩。豈非元域橐。奪得古人旗。日月精華薄。山川氣槩卑。古今吟不盡。惆悵不同時。

題簡禪師院

機忘室亦空。靜與沃洲同。惟有半庭竹。能生竟日風。思山海月上。出定印香終。繼後傳衣者。還須立雪中。

讀劉得仁賈島集

二公俱作者。其奈亦迂儒。且有諸峰在。何將一第吁。句還如菡萏。誰復贈襜褕。想得重泉下。依前與衆殊。

天台老僧

獨住無人處。松龕岳色侵。僧中九十臘。雲外一生心。白髮垂不剃。青眸笑轉深。猶能指孤月。爲我暫開襟。

經費隱君舊宅

巉巖玉九株。秀溼掩蒼梧。祥瑞久不出。羲軒消得無。雨和高瀑濁。燒燼大楮枯。到此思歸去。迢迢隔五湖。

秋末懷舊山

昔住匡廬北。無人知姓名。侵雲收穀粟。引蟻上柑橙。寒雨雪兼落。枯林虎獨行。誰能將白髮。共向此中生。

寄僧野和尚

鳥外更誰親。諸峰卽四鄰。白頭寒枕石。青衲爛無塵。橡栗堆行徑。猿猴遶定身。倘然重結社。願作掃壇人。

寄馮使君

端居碧雲暮。好鳥啼紅芳。滿郭桃李熟。捲簾風雨香。清吟繡段句。默念芙蓉章。未得歸山去。頻升謝守堂。

寄紫閣隱者

積翠藏一叟。常思未得遊。不知在巖下。爲復在峰頭。苔上枯藤筥。泉林破石樓。伊余更何事。不學此翁休。

春山行

重疊太古色。濛濛花雨時。好峰行恐盡。流水語相隨。黑壤生紅黍。黃猿領白兒。因思石橋月。曾與故人期。

春過鄱陽湖

百慮片帆下。風波極目看。吳山兼鳥沒。楚色入衣寒。過此愁人處。始知行路難。夕陽沙島上。回首一長歎。

秋末江行

四顧木落盡。扁舟增所思。雲衝遠燒出。帆轉大荒遲。天際霜雪作。水邊蒿艾衰。斷猿不堪聽。一聽亦同悲。

題友人山居

卜居鄰塢寺。魂夢又相關。鶴本如雲白。君初似我閑。月明僧渡水。木落火連山。從此天台約。來茲未得還。

秋居寄王相公

松聲高似瀑。藥熟色如花。誰道全無病。時猶不在家。山童春菽粉。園叟送銀瓜。那訪孫宏閣。談元到日斜。

送友人下第遊邊

失意窮邊去。孤城值晚春。黑山霞不赤。白日鬼隨人。角咽胡風緊。沙昏磧月新。明時至公在。迴首莫因循。

懷武昌棲一

風清江上寺。霜灑月中碁。得句先呈佛。無人知此心。寂寥從鬼出。蒼翠到門深。惟有雙峯下。時時獨去尋。

寒食郊外

寒食將吾族。相隨過石溪。塚花沾酒落。林鳥學人啼。白水穿蕪疾。新霞出霧低。不堪迴首望。家在赤松西。

懷錢唐羅隱章魯封

二子依公子。雞鳴狗盜徒。青雲十上苦。白髮一莖無。風澁潮聲惡。天寒角韻孤。別離千萬里。何以慰榮枯。

桐江閑居作

不問賡桑子。唯師妙吉祥。等閑眠片石。不覺到斜陽。獨自收楸葉。教童採柏瓢。王孫莫指笑。淡泊味還長。

寄棲一上人

花塹接滄洲。陰雲閉楚邱。雨聲雖到夜。吟味不如秋。古屋藏花鴿。荒園聚亂流。無機心便是。何用話歸休。

古塞下曲

下營依遁甲。分帥把河隍。地使人心惡。風吹旗燄荒。搜山得探卒。放火獵黃羊。唯有南飛雁。聲聲斷客腸。歸去是何年。山連邏迤川。蒼黃爭戰地。空闊養鷗天。旗插蒸沙堡。槍擔桌槩泉。蕭條寒日落。號令徹窮邊。虜寇日相持。如龍馬不肥。突圍金甲破。趁賊鐵槍飛。漢月堂堂上。胡雲慘慘微。黃河冰已合。猶未送征衣。

榆葉飄蕭盡。關防烽寨重。寒來知馬疾。戰後覺人兇。燒逐飛蓬死。沙生毒霧濃。誰能奏明主。功業已堪封。
古塞上曲

幽并兒百萬。百戰未曾輸。蕃界已深入。將軍仍遠圖。月明風拔帳。磧暗鬼騎狐。但有東歸日。甘從筋力枯。
中軍殺白馬。白日祭蒼蒼。號變旗幡亂。沙乾草木黃。朔雲含凍雨。枯骨放妖光。故國今何處。參差近鬼方。
久雨始無塵。邊聲四散聞。浸河荒寨柱。吹角白頭軍。戰馬齧腥草。烏鳶識陣雲。征人心力盡。枯骨更遭焚。
地角天涯外。人號鬼哭邊。大河流敗卒。寒日下蒼烟。殺氣諸蕃動。軍書一箭傳。將軍莫惆悵。高處是燕然。
送僧之靈夏

舊識爲邊帥。師遊勝事兼。連天唯白草。野餅有紅鹽。蕃近風多軟。河渾磧半淹。因知心似月。處處有人瞻。
江陵寄翰林韓偓學士

久住荆溪北。禪關挂綠蘿。風清閑客去。睡美落花多。萬事皆妨道。孤峯謾憶他。新詩舊知己。始爲味如何。
懷匡山山長

白石峯之半。先生好在麼。捲簾當大瀑。常恨不如他。杉罅龍涎溢。潭坳石髮多。吾皇搜草澤。爭奈謝安何。
晚春寄張侍郎

遐想涪陵岸。山花半已殘。人心何以遣。天步正艱難。鳥聽黃袍小。城臨白帝寒。應知窗下夢。日日到江干。

黃袍
鳥名。

遇五天僧入五臺

雪嶺頂危坐。乾坤四顧低。河橫于闐北。日落月支西。水石香多白。猿猴老不啼。空餘忍辱草。相對色萋萋。

秋寄李頻使君

務簡趣難陪。清吟共綠苔。葉和秋蟻落。僧帶野香來。留客朝嘗酒。憂民夜畫灰。終期冒風雪。江上見宗雷。

送廬山衲僧

飛錫下崆峒。清高世少雙。凍天方篩雪。別我去何邦。燒繞赤烏亥。雲漫白蚌江。路人爭得識。空仰鬢眉厖。

送人之嶺外

見說還南去。迢迢有侶無。時危須早轉。親老莫他圖。小店蛇羹黑。空山象糞枯。三閭遺廟在。爲我一嗚呼。

湖頭別墅

梨栗鳥啾啾。高歌若自由。人誰知此意。舊業在湖頭。飢鼠掀菱殼。新蟬避栗皺。不知江海上。戈甲幾時休。

秋末長興寺作

荒寺古江濱。莓苔地絕塵。長廊飛亂葉。寒雨更無人。栗不和皺落。僧多到骨貧。行行行未得。孤坐更誰親。

避寇入銀山

草草穿銀峽。崎嶇路未諳。傍山爲店戍。永日繞溪潭。燒地生芑蕨。人家煮僞蠶。翻如歸舊隱。步步入烟嵐。

秋夜作因懷天台道者

萬事何須問。良時卽此時。高秋半夜雨。落葉滿前池。靜怕龍神識。貧從草木欺。平生無限事。祇有道人知。

邊上行

黑松林外路。風角遠噍噍。朔氣生荒堡。秋塵滿病容。豺掎沙底骨。人上月邊烽。休作西行計。西行地漸兇。

登鄱陽寺閣

寺樓閑縱望。不覺到斜暉。故國在何處。多年未得歸。寒江平楚外。細雨一鴻飛。終毀於陵子。吳山有綠薇。

送僧之安南

安南千萬里。師去趣何長。鬢有炎州雪。心爲異國香。退牙山象惡。過海布帆荒。早作歸吳計。無忘父母鄉。

送僧歸剡山

遠逃爲亂處。寺與石城連。木落歸山路。人初刈剡田。荒林猴咬栗。戰地鬼多年。好去楞伽子。精修莫偶然。

送僧入五洩

五洩江山寺。禪林境最奇。九年喫菜粥。此事少人知。山響僧擔穀。林香豹乳兒。伊余頭已白。不去更何之。

旅中懷孫路

暮塵微雨收。蟬急楚鄉秋。一片月出海。幾家人上樓。砌香殘果落。汀草宿烟浮。唯有知音者。相思歌白頭。

貽世

至理不誤物。悠悠自不明。黃金燒欲盡。白髮火邊生。苦惑神仙繼。難收日月精。捕風兼繫影。信矣不須爭。

覽李秀才卷

香沐整山衣。開君一軸詩。吟當秋景苦。味出雪林遲。經濟幾人到。工夫兩鬢知。因嗟和氏淚。不是等閒垂。

懷方干張爲

冥搜入仙窟。半夜水堂前。吾道祇如此。古人多亦然。螢沈荒塢霧。月苦綠梧蟬。因憶垂綸者。滄浪何處邊。

四皓圖

何人圖四皓。如語話嘮嘮。雙鬢雪相似。是誰年最高。溪苔連豹褥。仙酒汗雲袍。想得忘秦日。伊余亦合逃。

懷白閣道侶

寒思白閣層。石屋兩三僧。斜雪掃不盡。飢猿喚得應。香然一字火。磬過數潭冰。終必相尋去。孤懷久不勝。

讀孟郊集

東野子何之。詩人始見詩。清冽霜雪髓。吟動鬼神司。舉世言多媚。無人師此師。因知吾道後。冷淡亦如斯。

懷四明亮公

孤峰含紫烟。師住此安禪。不下便不下。如斯太可憐。坐侵天井黑。吟久海霞薦。豈覺塵埃裏。干戈已十年。

秋過錢塘江

巨浸東隅極。山吞大野平。因知吳相恨。不盡海濤聲。黑氣騰蛟窟。秋雲入戰城。遊人千萬里。過此白髭生。

上俞許二判官

近拋蓑笠者。急善遇休明。未省親宗伯。焉能識正聲。病容經夏在。岳夢入秋并。無限林中意。今逢許郭傾。

懷劉得仁

詩名動帝畿。身謝亦因詩。白日只如哭。皇天得不知。旅墳孤躡岳。羸僕泣如兒。多少求名者。聞之淚盡垂。

歸故林後寄二三知己

昨別楚江邊。逡巡早數年。詩雖清到底。人更瘦於前。岸翠連喬嶽。汀沙入壤田。何時重一見。談笑有茶烟。

春寄西山陳陶

搔首復搔首。孤懷草萋萋。春光已滿目。君在山西。澗水成文去。庭柯擎翠低。所思不可見。黃鳥花中啼。

送人歸新羅

昨夜西風起。送君歸故鄉。積愁窮地角。見日出扶桑。蜃氣生初霽。潮痕匝亂荒。從茲頭各白。魂夢一相望。

思匡山賈匡

山兄詩癖甚。寒夜更何爲。覓句爲頑坐。嚴霜打不知。石膏黏木屐。崖蜜落冰池。近見禪僧說。生涯勝往時。

偶作

十載獨扃扉。誰爲二雅詩。道孤終不雜。頭白更何疑。句冷杉松與。嚴霜鼓角知。修心對閑鏡。明月印秋池。

贈方干

盛名與高隱。合近謝敷村。弟子已得桂。先生猶灌園。垂綸侵海介。拾句歷雲根。白日昇天路。如君別有門。

漁父

一葉一竿竹。眉鬚雪欲零。陸應無祖業。香必是伊腥。兒亦名魚鷁。歌稱我洞庭。回頭深自媿。舊業近滄溟。

寄宋使君

寺倚烏龍腹。窗中見碧稜。空廊人畫祖。古殿鶴窺燈。風吼深松雪。爐寒一鼎水。唯應謝內史。知此道心澄。

懷武夷紅石子

常思紅石子。獨自住山椒。窗外猩猩語。爐中姪姪嬌。乳香諸洞滴。地秀衆峰朝。曾見奇人說。烟霞恨太遙。

送人征蠻

七縱七擒處。君行事可攀。亦知磨一劍。不獨定諸蠻。樹盡低銅柱。潮常沸火山。名須麟閣上。好去及瓜還。

懷周朴張爲

二子無消息。多應各自耕。巴江思杜甫。漳水憶劉楨。白髮應全白。生涯作麼生。寄書長不達。空念重行行。

鄱陽道中作

鄱陽古岸邊。無一樹無蟬。路轉他山大。砧驅鄉思偏。湖平帆盡落。天淡月初圓。何事堯雲下。干戈滿許田。

歸故林別知己

別離無今古。柳色向人深。萬里長江水。平生不印心。遠書容北雁。贈別謝南金。媿勉青雲志。余懷非陸沈。

硯瓦

淺薄雖頑朴。其如近筆端。低心蒙潤久。入匣更身安。應念研磨苦。無爲瓦礫看。倘然仁不棄。還可比瑯玕。

水壺子

良匠曾陶瑩。多居筆硯中。一從親几案。常恐近兒童。卓立澄心久。提攜注意通。不應嫌器小。還有濟人功。

筆

莫訝書紳苦。功成在一毫。自從蒙管錄。便覺用心勞。手點時難棄。身閑架亦高。何妨成五色。永願助風騷。

棋

棋信無聲樂。偏宜境寂寥。著高圖暗合。勢王氣彌驕。人事掀天盡。光陰動地銷。因知韋氏論。不獨爲吳朝。

夜對雪作寄友生

皓彩中宵合。開門失所蹤。何年今夜意。共子在孤峰。氣射燈花落。光侵壁罅濃。唯君心似我。吟到五更鐘。

題惠琮律師院

苦節兼青目。公卿話有餘。唯傳黃葉喻。還似白泉居。猿撥孤雲破。鐘撞衆木疎。社壇蹤跡在。重結復何如。

寄清泠山道人

常憶清泠子。深雲種早禾。萬緣雖不涉。一句子如何。蹤跡諸峰匝。衣裳老虱多。江頭無事也。終盼到烟蘿。

秋盡途中作

行行芳草歇。潭島葉紛紛。山色路無盡。□聲客強聞。殘陽曜極野。黑水浸空墳。那得無鄉思。前程入楚雲。

聞徵四處士

一詔羣公起。移山四海聞。因知丈夫事。須佐聖明君。白酒全傾甕。蒲輪半載雲。從茲居諫署。筆硯幾人焚。

寄匡山紀公

錦繡谷中人。相思入夢頻。寄言無別事。琢句似終身。書卷須求旨。鬚根易得銀。斯言如不惑。千里亦相親。

聞無相道人順世

一事不經營。孤峰長老情。惟餐橡子餅。愛說道君兄。池藕香狸掘。山神白日行。又聞行腳也。何處化羣生。

苦熱

松桂枝不動。陽鳥飛半天。稻麻須結實。沙石欲生烟。毒氣仍干扇。高枝不立蟬。舊山多積雪。歸去是何年。

鄂渚贈祥公

寂寥堆積者。自爲是高僧。客遠何人識。吟多冷病增。松烟青透壁。雪氣細吹燈。獨賴師於我。依依非面朋。

懷武昌棲一

常憶能吟一。房連古帝墟。無端多忤物。惟我獨知渠。病愈囊空後。神清木落初。祇因烽火起。書札自茲疎。

送道士歸天台

道高留不住。道去更何云。舉世皆趨世。如君始愛君。徑侵銀地滑。瀑到石城聞。他日如相憶。金桃一爲分。

經孟浩然鹿門舊居二首

孟子終焉處。遊人得得過。機深黃狹小。地煥白雲多。孔聖嗟大謬。元宗爭奈何。空餘峴山色。千古共嵯峨。花落谷鶯啼。精靈安在哉。青山不可問。永日獨裴回。塚穴應藏虎。荒碑祇見苔。伊余亦惆悵。昨日郢城迴。

春送禪師歸閩中

春色滿三湘。送師還故鄉。穿霞逢黑鷓。乞食得紅薑。大化宗門闢。孤禪海樹涼。倘爲新句偈。寄我亦何妨。

途中逢周朴

東西南北路。相遇共興哀。世濁無知己。子從何處來。菊衰芳草在。程遠宿烟開。倘遇中興主。還應不用媒。

避寇上唐臺山

蒼黃緣鳥道。峰脅見樓臺。檀桂香皆滴。煙霞溼不開。僧高眉半白。山老石多摧。莫問塵中事。如今正可哀。

題嶧桐律師院

律中麟角者。高談出塵埃。芳草不曾觸。幾生如此來。壑口吹磬斷。杉露滴花開。如結林中社。伊余亦願陪。

懷諸葛珏

諸葛子作者。詩曾我細看。出山因覓孟。踏雪去尋韓。遇孟郊韓愈于各下謬獨哭不錯。諸葛云思牽吳岫常流飲實難。諸葛

僧名然有詩云到處
自慙非不能飲常流。知音知便了，歸去舊江干。

送沈侍郎

從知無過近，木落去閩城。地入無諸俗，冠峨甲乙精。山多高興亂，江直好風生。儉府清無事，唯應薦禰衡。

題宿禪師院

身閑心亦然，如此已多年。語淡不著物，茶香別有泉。古衣和藓衲，新偈幾人傳。時說秋歸夢，孤峰在海邊。

秋晚泊石頭驛有寄

蕭索漳江北，何人慰寂寥。北風人獨立，南國信空遙。燒塢新雲白，漁家衆木凋。所思不可見，行雁在青霄。

全五代詩卷五十

前蜀

賈休四

秋夜吟

如愚復愛詩。木落卽眠遲。思苦香消盡。更深筆尙隨。飢童舂赤黍。繁露灑烏椀。看卻龍鍾也。歸山是底時。

桐江閑居作

木落雨翛翛。桐江古岸頭。擬歸仙掌去。剛被謝公留。猛燒侵茶塢。殘霞照角樓。坐來還有意。流水面前流。香剎通真觀。樓臺倚郡城。陰森古樹氣。粗淡老僧情。壁畫連山潤。仙鐘扣月清。何須結西社。大道本無生。靜室焚檀印。深爐燒鐵瓶。茶和阿魏煖。火種柏根馨。數隻飛來鶴。成堆讀了經。何妨似支遁。騎馬入青冥。詩琢冰成句。多將大道論。人誰知此意。日日祇關門。乳鼠穿荒壁。溪龜上淨盆。因知無事貴。言外更無言。紅黍飯溪苔。清吟茗數杯。祇應唯道在。無意俟時來。樹疊藏仙洞。山蒸足爆雷。從他嫌復笑。門更不曾開。塹鳥毛衣別。頻來似愛吟。蕭條秋病後。斑駁綠苔深。珠翠籠金像。風泉灑玉琴。孰知吾所適。終不是心心。憶在山中日。爲僧鬢欲衰。一燈常到曉。十載不離師。水汲冰溪滑。鐘撞雪閣危。從來多自省。不學擬何爲。囊非撲滿器。門更絕人過。土井連岡冷。風簾迸葉多。村童頑似鐵。山菜硬如莎。唯有前山色。窗中無奈何。

寄馮使君

山風與霜氣。浩浩滿松枝。永日燒杉子。無人共此時。爲文攀諷諫。得道在毫釐。唯有桐江守。常憐志不卑。

經棲白舊院

竺卿何處去。觸目盡淒涼。不見中秋月。空餘一炷香。殘花飄暮雨。枯葉蓋啼螿。誰禮新墳塔。蕭條渭水旁。

贈李祐道人

關茸復埃塵。難親復易親。皆疑有仙術。問著卻愁人。祇是耽浮蟻。曾云見泣麟。相逢先合手。渾似有前因。

贈景和尚院

藏經看幾徧。眉有數條霜。萬境心都泯。深冬日亦長。窗虛花木氣。衲挂水雲鄉。時說秋歸夢。峰頭雪滿牀。

上宋使君

折桂文如錦。分憂力若春。位高空倚命。詩妙古無人。有感禾爭熟。無私吏盡貧。野人如有幸。應得見陶鈞。

離亂後寄九峰和尚二首

亂後知深隱。菴應近石樓。異香因雪歇。仙果落池浮。詩老全拋格。心空未到頭。還應嫌笑我。世路獨悠悠。蕭灑復蕭灑。松根獨據梧。瀑冰吟次折。遠燒坐來無。老櫻寒披衲。孤雲靜入廚。不知知我否。已到不區區。

送王貞白重試東歸

心苦酬心了。東歸謝所知。可憐重試者。如折兩三枝。雨毒逢花少。山多愛馬遲。此行三可羨。正值倒戈時。

寄西山胡汾

待價欲要君。山前獨灌園。雖然不識面。要且已消魂。鹿睡紅霞影。泉淋白石門。伊余心更苦。何日共深論。

寄赤松舒道士

余亦如君也。詩魔不敢魔。一餐兼午睡。萬事不如他。雨陣衝溪月。蛛絲罨砌莎。近知山果熟。還擬寄來麼。

鄂渚逢楊贊禹

流浪兵荒苦。相思歲月闌。理唯通至道。人或謂無端。燒猛湖烟赤。窗空雪月寒。知音不可見。始爲一吟看。

別性空禪師

積翠迸一瀑。紅霞碧霧開。方尋此境去。莫問幾時迴。盪槩入檐石。思詩聞早雷。唯師心似火。欲近不然灰。

送胡處士

不名兼不利。相遇海西濱。白字未干髮。清時錯愛雲。頭巾多酒氣。竹杖有苔文。久積希顏意。林中又送君。

寄瀾公二首

小一頭應白。孤高住歙城。不知安樂否。何以近無生。燒逼鴻行側。風乾雪朕清。途中逢此信。珍重未精誠。

光洞山道人云。吾生
獨自往。處處得逢渠。

瀑瀾羣公社。江崩古帝墟。終期再

相見。招手復何如。

送僧之湖南

湘水萬餘里。師遊芳草生。登山乞食後。無伴入雲行。宿雨和花落。春牛擁霧耕。不知今夜月。何處聽猿聲。

秋末寄張侍郎

靜坐黔城北。離人半歲彊。霧中紅黍熟。燒後白雲香。多病如何好。無心去始長。寂寥還得句。溪上寄三張。

古塞曲

單于烽火動。都護去天涯。別賜黃金甲。親臨白玉除。塞垣須靜謐。師旅審安危。定遠條支寵。如今勝古時。方見將軍貴。分明帶冕旒。聖恩如遠被。狂虜不難收。臣節唯期死。功勳敢望侯。終辭修里第。從此上皇州。百萬精兵動。參差便渡遼。如何好白日。亦照此天驕。遠樹深疑賊。驚蓬迴似鷗。凱歌何日唱。磧路共天遙。南北惟堪恨。東西實可嗟。常飛侵夏雪。何處有人家。風刮陰山薄。河推大岸斜。祇應寒夜夢。時見故園花。不是將軍勇。胡兵豈易當。雨曾淋火陣。箭又中金瘡。鐵嶺全無土。豺羣亦有狼。因思無戰日。天子是陶唐。萬戰千征地。蒼茫古塞門。陰兵爲客祟。惡酒發刀痕。風落崑崙石。河崩苜蓿根。將軍更移帳。日日近西蕃。白雁兼羌笛。幾年垂淚聽。陰風吹殺氣。永日在青冥。遠戍秋添將。邊烽夜雜星。嫖姚頭半白。猶自看兵經。帳幕侵奚界。憑陵未可涯。擒生行別路。尋箭向平沙。赤落蒲桃葉。香微甘草花。不堪登隴望。白日又西斜。山接胡奴水。河連勃勃城。數州今已伏。此命豈堪輕。磧吼旄頭落。風乾刁斗清。因嗟李陵苦。祇得沒蕃名。掃盡狂胡迹。迴頭望故關。相逢唯死鬪。豈易得生還。縱宴參胡樂。收兵過雪山。不封十萬戶。此事亦應閑。

玉帳將軍意。殷勤把酒論。功高寧在我。陣歿與招魂。塞色干戈束。軍容喜氣屯。男兒今始是。讎出玉門關。回首隴山頭。連天草木秋。聖君應入夢。半路遣封侯。水不擔陰雪。柴令倒戍樓。歸來麟閣上。春色滿皇州。

夜寒寄盧給事

刻羽流商否。霜風動地吹。邇來唯自惜。知合是誰知。塹雪消難盡。鄰僧睡太奇。知音不可得。始爲一吟之。

送葉蒙赴舉

年年屈復屈。惆悵曲江湄。自古身榮者。多非年少時。空囊投刺遠。大雪入關遲。來歲還公道。平人不用疑。

聞王慥常侍卒

世亂君巡狩。清賢又告亡。星辰皆有角。日月略無光。金柱連天折。瑤階被賊荒。令人轉惆悵。無路問蒼蒼。宗社連微衰。山摧甘井枯。不知千載後。更有此人無。政入龔黃甲。詩輕沈宋徒。受恩酬未得。不覺祇長吁。

秋晚野步

藤履兼閩竹。吟行一水傍。樹涼蟬不少。溪斷路多荒。燒岳陰風起。田家濁酒香。登高吟更苦。微月出蒼茫。

聞大願和尚順世

王室今如燬。仍聞喪我師。古容圖得否。內院去無疑。岳鬼月中哭。松龕雪次隳。直須文五色。始可立高碑。師稟盡名卿。孤峰老稱情。若遊三點外。爭把七賢平。苦霧埋空室。啼猿有咽聲。今朝益惆悵。曾沐下牀迎。

嚴常念法華經師見卽下牀
迎云吾不敢以衆人相待也

明進士北齋避暑

相訪多衝雨。由來德有隣。卷簾繁暑退。溼樹一蟬新。道在誰爲主。吾衰自有因。祇應江海上。還作狎鷗人。

晚春寄吳融于競二侍郎

白頭爲遠客。常憶白雲間。祇覺老轉老。不知閑是閑。花含宜細雨。室冷是深山。唯有霜臺客。依依是往還。

喜不思上人來

沃州那不住。一別許多時。幾度懷君夜。相逢出夢遲。瓶擔千丈瀑。偈是七言詩。若向羅浮去。伊余亦願隨。

秋懷赤松道士

仙觀在雲端。相思星斗寒。常憐呼鶴易。卻恨見君難。石罅青蛇溼。風榭白菌乾。終期花月下。壇上聽君彈。

送劉逖赴閩辟

離亂生涯盡。依劉是見機。從來吟太苦。不得力還稀。路入閩山熟。江浮瘴雨肥。何須折楊柳。相送已依依。

苦雨中作

通宵復連夕。其狀祇如傾。卻遣思山者。忽然嫌水聲。好花飄草盡。古壁欲雲生。不奈天難問。迢迢遠客情。

送僧歸日本

焚香祝海靈。開眼夢中行。得達卽便是。無生可作輕。流黃山火著。礙石索雷鳴。想到夷王禮。還爲上寺迎。
有僧遊日本云。彼祇有三寺。上寺名兜率。國王供養。中寺名淨土。極品官人供養。下寺名祇上寺。風俗供養。有德行卽漸遷上也。

贈信安鄭道人

貌古似蒼鶴。心清如鼎湖。仍聞得新義。便欲註陰符。點化金常有。閑行影漸無。杳兮中便是。應不食菖蒲。

送智光禪伯

萬事歸一衲。曹溪初去尋。從來相狎輩。盡不是知音。乞食林花落。穿雲翠巘深。終希重一見。示我祖師心。

送王穀及第後歸江西

太宗羅俊彥。桂玉比光輝。難得終須得。言歸始是歸。風帆天際吼。金鷄月中飛。五府如交辟。魚書莫便稀。

送盧瞻罷廬陵幕歸閩鄉

文行成身事。從知貴得仁。歸來還寂寞。何以慰交親。芳草色似動。胡桃花又新。昌朝有知己。好作諫垣臣。

聞李頻員外卒

蒼蒼難可問。問答亦難聞。落葉平津岸。愁人李使君。文章應力竭。茅土始天分。又逐東風去。迢迢隔嶺雲。

閑居作

閑門微雪下。慵惰計全成。默坐便終日。孤峰祇此清。身心閑少夢。杉竹冷多聲。唯有西峰叟。相逢眼最明。

寄山中伉禪師

舉世遭心使。吾師獨使心。萬緣冥目盡。一句不言深。野火燒禪石。殘霞照栗林。秋風溪上路。終願一相尋。

懷匡山山長

見說面前峰。尋常醉亦登。雨餘多菌出。燒甚古崖崩。覓句曾衝虎。耕田半爲僧。聞名多歲也。常恨不飛騰。

懷高真動

知爾今何處。孤高獨不羣。論詩唯許我。窮易到無文。貫酒兒穿雪。尋僧月照雲。何時再相見。兵寇尙紛紛。

秋末入匡山船行八首

楚國茱萸月。吳吟梨栗船。遠遊無定所。高臥是何年。浪卷紛紛葉。牆衝澹澹煙。去心還自喜。廬岳倚青天。
蘆葦深花裏。漁歌一曲長。人心雖憶越。帆態似浮湘。石獺銜魚白。汀茅浸浪黃。等閑千萬里。道在亦無妨。
島上離家化。茅茨竹戶開。黃桑雙鵲喜。白日有誰來。擔浪澆秋芋。緣灘取淨苔。回頭深自媿。舊業本蒿萊。
匡阜層層翠。修江疊疊波。從來未曾到。此去復如何。水廟寒鴉集。沙村夕照多。誰知垂釣者。孤坐鬢皤皤。
晚泊蒼茫浦。風微浪亦粗。估喧如亥合。檣密似林枯。地峻湖無口。潮寒蚌有珠。東西無定所。何用問前途。
島香思賈島。江碧憶清江。囊橐誰相似。饑慵世少雙。鼯驚入窟月。燒到繫船椿。謾有歸鄉夢。前頭是楚邦。
南北雖無適。東西亦似萍。霞根生石片。象跡壞沙汀。莽莽蒹葭赤。微微蜃蛤腥。因思范蠡輩。未免亦飄零。
曉色千檣去。長江八月時。雨淙山骨出。棹擲岸形卑。野水畚田黑。荒汀獨鳥癡。如今是清世。誰道出山遲。

送僧歸華山

心枯衲亦枯。歸岳揭空盂。七貴留不住。孤雲出更孤。燒灰獨湯足。雪片似黏鬚。他日如相覓。還應道到吳。

送令狐煥赴闕

渚宮遙落日。相送碧江湄。陟也須爲相。天乎更贊誰。風高檣力出。霞熱鳥行遲。此去多來客。無忘慰所思。

送陳秀才赴舉兼寄韓舍人

主聖臣賢日。求名莫等閑。直須詩似玉。不用力如山。草白兵初息。年豐駕已還。憑將安養意。一說向曾顏。

昔西社羣公盡生安養。安養西方也。

送友人及第後歸台州

得桂爲邊辟。翩翩頗合宜。嫖姚留不住。晝錦已歸遲。島側花藏虎。湖心浪撼棋。終期華頂下。共禮淥身師。

天台石橋有白道。猷坐化身淥也。

寄景判官兼思州葉使君

獨往西峰半。尋常欲下難。石多桐屐齧。香甚藥花乾。荏苒新鶯老。窮通亦自寬。髯叅與短簿。始爲一吟看。

送盧秀才應舉

幾載阻兵荒。一名終不忘。還衝猛風雪。如畫冷朝陽。時名畫李白、王昌齡、常建冷朝陽冒風雪入京。句好慵將出。囊空卻不忙。明年公道日。去去必穿楊。

聞新蟬寄桂雍

新蟬終夜叫。嘒嘒隔溪濱。杜宇仍相雜。故人聞不聞。捲簾花動月。冥目砌生雲。終共謝時去。西山鸞鶴羣。

寄懷楚和尚二首

吾師師子兒。而復貌瓌奇。何得文明代。不爲王者師。鐵盂湯雪早。石炭煮茶遲。謾有參尋意。因循到亂時。跳躑諸峯險。回翔萬里空。爭將金鎖鎖。那把玉籠籠。印缺香崩火。窗疎蝎喫風。永懷今已矣。吟坐雪濛濛。

和韋相公話婺州陳事

昔事堪惆悵。談元愛白牛。法華經以白牛喻大乘。千場花下醉。一片夢中遊。耕避初平石。燒殘沈約樓。無因更重到。且

副濟川舟。

遇五天僧入五臺

十萬里到此。辛勤詎可論。唯云吾上祖。見買給孤園。一月行沙磧。三更到鐵門。白頭鄉思在。迴首一銷魂。送迎經幾國。多化帝王心。電激青蓮目。環垂紫磨金。眉根霜入細。梵夾蠹難侵。必似陀波利。他年不可尋。

秋寄李頻使君

爲郎須塞詔，當路亦馳驅。貴不因人得，清還似句無。燒煙連野白，山藥搗階枯。想得徵黃詔，如今已在途。

上東林和尚

讓紫歸青壁，高名四海聞。雖然無一事，得不是要君。道祇傳伊字，詩多笑碧雲。應憐門下客，餘力亦爲文。

江邊道士

獨住大江濱，不知何代人。藥鑪生紫氣，肌肉似紅銀。酒醞竹屋爛，符收山鬼仁。何妨將我去，一看武陵春。

送僧之湖外

去旨趣非常，春風爾莫狂。惟擎一鐵鉢，舊亦講金剛。午飯孤煙裏，宵禪大石旁。羨師終不及，湘浪淥茫茫。

懷謬獨

常憶蘭陵子，瓌奇皴渴才。思還如我苦，時不爲伊來。岳霞猿擲雪，湖月浪翻杯。未聞霑寸祿，此事亦堪哀。

休糧僧

不食更何憂，自由中自由。身輕嫌衲重，天旱爲民愁。應器誰將去，生臺蟻不遊。會須傳此術，相共老山邱。

題宏式和尚院兼呈杜使君

二雅兼二密，惓惓祇自怡。臘高雲屐朽，貌古畫師疑。塹蟻緣金錫，鑪烟惹雪眉。仍聞有新作，祇是寄相思。

全五代詩卷五十一

前蜀

貫休五

題令宣和尚院

軒窗領嵐翠。師得世情忘。惟愛談諸祖。曾經宿大荒。泉聲淹臥榻。雲片犯鑪香。寄語題門者。看經在上方。

寄四明閻邱道士二首

淮海兵荒日。分飛直至今。知擔諸子出。卻入四明深。衣必編仙草。僧應共栗林。秋風溪上路。應得一相尋。三千功未了。大道本無程。好共禪師好。常將藥犬行。石門紅蘚剝。柘塢白雲生。莫認無名是。無名已是名。

經士馬中作

偷見成大寇。處處起烟塵。黃葉滿空宅。青山見俗人。妖星芒刺越。鬼哭勢連秦。惆悵還惆悵。茫茫江海濱。士馬後見赤松舒道士。

滿眼盡瘡痍。相逢相對悲。亂階猶未已。一柱若爲支。堰茗蒸紅棗。看花似好時。不知今日後。吾道竟何之。與劉象正字

獨居三島上。在觀中住。花竹映柴關。道廣羣仙惜。名成萬事閑。病多惟縱酒。靜極不思山。唯有逍遙子。時時自往還。

懷智體道人

栖碧思吾友。庭鶯百轉時。唯應一處住。方得不相思。雲水淹門闕。春雷在樹枝。平生無限事。不獨白雲知。

贈晦公禪人

流陽爲役者。相訪葉紛紛。有句雖如我。無心未似君。搆林青及竹。茆屋暖於雲。何日相將去。千山麋鹿羣。

寄靜林別墅胡進士兄弟

見說山居好。書樓被翠侵。燒燦汀島境。月色弟兄吟。犬吠黃裨落。牛歸紅樹深。仍聞多白菌。應許一相尋。

懷赤松故舒道士

可惜復可惜。如今何所之。信來堪大慟。余復用生爲。亂世今交鬪。元宮玉柱隳。春風五陵道。迴首不勝悲。

偶作

無端爲五字。字字鬢星星。祇覺人情薄。空餘鶴眼青。砌莎藏墜果。窗雪浸殘經。祇有歸山計。茫茫何所營。

春日許徵君見訪

龍鍾多病後。日望遇昇平。遠念穿蒿雪。前林轉早鶯。廚香烹瓠葉。道友叩門聲。還似青溪上。微吟踏葉行。

經先主廟作

古廟積烟蘿。威靈及物多。因知曹孟德。爭奈此公何。樹古蠹痕剝。碑荒篆畫訛。今朝冥禱祝。祇望息干戈。

寄中條道者

柏梯杉影裏。頭白藥山孫。今古管不得。是非爭肯論。虎鬚懸瀑滴。禪衲帶苔痕。常恨龍鍾也。無因接話言。

夏日晚望

登臨聊一望。不覺意悵然。陶侃寒溪寺。如今何處邊。汀沙生早霧。山火照平川。終事東歸去。干戈滿許田。

大駕西幸秋日聞雷

軍書日日催。處處起塵埃。黎庶何由泰。鑾輿早晚回。夏租方減食。秋日更聞雷。莫道蒼蒼意。蒼蒼眼甚開。

言詩

經天緯地物。動必計仙才。幾處覓不得。有時還自來。真風含素髮。秋色入靈臺。吟向霜蟾下。終須神鬼哀。

秋末江上望

莽莽古江濱。紛紛墜葉頻。煙霞誰是主。邱隴自傷神。吞併寧惟漢。淒涼莫問陳。盡隨流水去。寂寞野花春。

乞食僧

擎鉢貌青羸。天寒出寺遲。朱門當大路。風雪立多時。似月心常淨。如麻事不知。行人莫輕誚。古佛盡如斯。

寒望九峰作

九朵碧芙蓉。王維圖未圖。層層皆有瀑。一一合吾居。雨歇如爭出。霜嚴不例枯。世猶多事在。爲爾久躊躇。

薊門寒月作

薊門寒到骨。戰磧雁相悲。古屋不勝雪。嚴風欲斷髭。清吟得冷句。遠念失佳期。寂寞誰相問。迢迢天一涯。

新蟬

尋常看不見。花落樹多苔。忽向高枝發。又從何處來。風清聲更揭。月苦意彌哀。多少求名者。年年被爾催。

寄廬山大願和尚

石上桂成叢。師菴在桂中。皆云習鑿齒。未可扣真風。雪洗香鑪碧。霞藏瀑布紅。何時甘露偈。一寄剡山東。

追憶馮少常

盛德方清貴。旋聞逐逝波。令人翻不會。積善合如何。直道登朝晚。分憂及物多。至今新定郡。猶咏袴襦歌。

聞閔廷言周璉下第

前榜年年見。高名日日聞。常因不平事。便欲見吾君。兄弟居清島。園林生白雲。相思空悵望。庭葉赤紛紛。

讀賈區賈島集

區終不下島。島亦不多區。冷格俱無敵。貧根亦似愚。青雲終歎命。白閣久圍鑪。今日成名者。還堪爲爾吁。

送衲僧之江西

索索復索索。無憑卻有憑。過溪遭惡雨。乞食得乾菱。祇有山相伴。更無事可仍。如逢梅嶺旦。向道祇寧馨。

湖頭別墅

桑柘參桐竹。陰陰一徑苔。更無他事出。祇有衲僧來。漚蟻爭生食。窗經卷燒灰。可憐門外路。日日起塵埃。南北如仙境。東西似畫圖。園飛青啄木。簷挂白蜘蛛。鄰叟教修廢。牛童與納租。寄言來往客。不用問榮枯。

三峽聞猿

歷歷數聲猿。寥寥渡白煙。應栖多月樹。況是下霜天。萬里客危坐。千山境悄然。更深仍不住。使我欲移船。

聞知聞赴成都辟請

文翁還化蜀。帟幕列鸛鸞。飲水臨人易。燒山覓士難。錦機花正合。櫻蕈火初乾。知己相思否。如何借羽翰。

題淮南惠照寺律師院

儀冠凝寒玉。端居似沃州。學徒梧有鳳。律藏日無牛。茗滑香黏齒。鐘清雪滴樓。還須結西社。來往悉諸侯。

寄杭州靈隱寺宋震使君

罷郡歸侵夏。仍聞靈隱居。僧房謝眺語。寺額葛洪書。

晉道士葛洪與靈隱寺書額了去至今在。

月樹獼猴在。山池菡萏疎。吾皇愛

清靜。莫使結吾廬。

送人歸夏口

雁雁葉紛紛。行人豈易聞。千山與萬水。何處更逢君。貌不長如玉。人生祇似雲。倘經三祖寺。一爲禮龕墳。

送新羅僧歸本國

忘身求至教。求得卻東歸。離岸乘空去。終年無所依。月衝陰火出。帆撻大鵬飛。想得還鄉後。多應著紫衣。

聞友人駕前及第

見心知命好。一別隔烟波。世亂無全士。君方掇大科。早隨鑾輅轉。莫戀蜀山多。必貢安時策。忠言奈爾何。

寒夜有懷同志

永夜殊不寐。懷君正寂寥。疎鐘寒徧郭。微雪靜鳴條。南省雁孤下。西林鶴屢招。終得謝時去。與子住山椒。

寄新定桂雍

獨自住烏龍。應憐是衲僧。句須人未道。君此事偏能。塢溼雲埋觀。溪寒月照罍。相思不可見。江上立騰騰。

贈靈鷲山道潤禪師院

常恨烟波隔。聞名二十年。結爲清氣引。來到法堂前。薪拾紛紛葉。茶烹滴滴泉。莫嫌來又去。天道本泠然。

海邊見羅鄴

清世詩聲出。誰人得似君。命通須有日。天未喪斯文。楚木寒連寺。修江碧入雲。相思喜相見。庭葉正紛紛。

送僧之東都

之子之東洛。囊中有偈新。紅塵誰不入。獨鶴自難親。定鼎門連嶽。黃河凍過春。憑師將遠意。說似社中人。

送于兢補闕赴京

亂離吾道在。不覺到清時。得句下雪岳。送君登玉墀。冷驚蟬韻斷。涼觸火雲墜。倘遇南來使。無忘問所之。

送鄭準赴舉

兩河兵火後。西笑見吾曹。海靜三山出。天空一鶚高。賃居槐搆屋。行卷雪埋袍。他日如相覓。栽桃近海濤。

秋望寄王使君

靜躡紅蘭徑。憑高曠望時。無端求句苦。永日壑風吹。大月生峰角。殘霞在樹枝。祇應劉越石。清嘯正相宜。

送緣有禪師與雷處士入武夷山

師與雷居士。尋山道入閩。應將熊耳印。別授武夷君。崖罅仙棺出。江根毒草分。他年相覓在。莫苦入深雲。

送友生入越投知己

才大終難住。東浮景漸暄。知將別足恨。去擊李膺門。宿霧開花塢。春潮入苧村。預思秋薦後。一鶚出乾坤。

寄烏龍山賈泰處士

庭果色如丹。相思夕照殘。雲邊踏燒去。月下把書看。澗水仙居共。窗風漆樹寒。吾君方側席。未可使懷安。

題大安寺通禪師院

應行諸岳徧。象屐半無綱。一法尋常說。此機仍未忘。窗閑藤影老。衲厚瀑痕荒。寄語迷津者。來茲問不妨。

春晚寄盧使君

滿郭春如畫。空堂心自澄。禪拋金鼎藥。詩和玉壺冰。白雨飄花盡。晴霞向閣凝。寂寥還得句。因寄柳吳興。

武昌縣與晝公兼寄邑宰

小一何人識。騰騰天地間。尋常如一鶴。亦不愛青山。鐵鉢年多赤。麻衣帶毳斑。祇聞尋五柳。時到月中還。避地寄高蟾。

懷武夷山禪師

荒寺雨微微。空堂獨掩扉。高吟多忤俗。此貌若爲飢。旅夢遭鴻喚。家山被賊圍。空餘老萊子。相見獨依依。萬壘仙山裏。無緣見有緣。紅心蕉繞屋。白額虎同禪。古木苔封菌。深崖乳雜泉。終期還此去。世事祇如然。秋末閑居作。

幽居山不別。落葉與階平。盡日吟詩坐。無端箇病成。徑苔因旱赤。池水入冬清。唯有東峰叟。相尋月下行。偶作因懷大同道友。

江西再逢周璉

蠻木葉不落。微吟漳水濱。二毛空有雪。萬事不如人。灑水平芳草。山花落淨巾。天童好真伴。何日更相親。六七年不見。相逢鬢已蒼。交情終淡薄。詩語更清狂。未得丹霄使。依前四壁荒。但令吾道在。晚達亦何妨。秋晚野居。

僻居人不到。吾道本來孤。山色園中有。詩魔象外無。□禾連島赤。烟草倚橋枯。何必求深隱。門前似畫圖。湖上作。

我竟胡爲者。嘯嘯但愛吟。身中多病在。湖上住年深。山窗穿苔壁。風鐘度雪林。近來心更苦。誰復是知音。

送僧歸天台寺

天台四絕寺。歸去見師真。莫折枸杞葉。令他拾得嗔。天空聞聖磬。瀑細落花巾。必若雲中老。他時得有鄰。

天台國清寺。有拾得

花巾。卽波羅巾也。

送僧入幽州

高士高無敵。騰騰話入燕。無人知爾意。向我道非禪。栗逕穿蕃塚。狼聲隔遠煙。盤山多道侶。應未有歸年。

送僧遊五臺

羨師遊五頂。乞食值年豐。去去誰爲侶。栖栖力已充。濁河高岸拆。衰草古城空。必到華嚴寺。憑師問辨公。

送吳融員外赴闕

漢文思賈傅。賈傅遂生還。今日又如此。送君非等閑。雲寒猶惜雪。燒猛似烹山。應笑無機者。騰騰天地間。

